


元許文忠公至正集

柳田文庫

文庫11

D 93

6



文庫11
D 93
6

27


6

010190548908

記

靜庵記

中臺總憲分二臺西南而錯置廿二道於天下其任若地莫不重也道之置直行省者六直宣慰者七直路府者九而鎮有宗藩者四宣慰下皆按部省則抗矣加事大藩則任若地益重矣有抗有事惟滇與鄂爾滇遐裔而治聽稍簡鄂據山川之重當荆蜀之會人俗慄悍司憲繩糾尤難其人高昌相閣實理世榮由奎章閣學士長憲湖南尋移湖北任若地益重人方觀其設施而乃不專威刑不煩文詆治其內而外自化行乎上而下不犯不知任若地之益重於前也燕坐有室顏曰靜庵請記其名靜之為義淵矣乎寂然不動者其體也無極未判不見兆朕而萬化出焉故冬不閉藏



則無以遂三時之生成夜不晦冥則無以發平旦之清明專而後直翕而後闢持之以敬養之以無欲則醇酢事變泛應而曲當矣一接於欲能不撓乎撓而不已則去道遠矣富貴利達之闢於中聲色貨殖之眩於前闢而能以義勝眩而能以理遣者鮮矣善乎周子之言曰無欲則靜此入德之要也且事物之來紛糾膠擾白黑短長曲直之未形眾喙啁噪簧鼓於其側萬狀顯晦鬼昧乎其前耳目不為之變心志不為之掉者幾何人哉當是時也存乎吾者湛然虛明猶止水不波鬢眉可燭路雖千岐而惟正是適焚雖萬緒而惟一可理靜之功亦至矣乎故曰不能靜者不能動惟靜者而後能動也世榮早歷華貫在奎章予實同官尤悉其賢當世二道最重之任而行其所無事其有得於靜者乎推此道也鈞軸機務之繁皆有以應之况一道乎管子曰靜而能制動靜而制動

管仲猶能為之而况不為管仲者乎

樂善堂記

天生蒸民其情莫不就福而避禍以福可樂禍可憂也心非狂惑孰肯就憂而避樂然世之僭僭焉日趨於憂而不悟者何哉私意蔽其中物欲誘其外也嘗念人生百歲雷電不足以喻其速所貴於生者樂爾而世之樂者或紆朱懷金高牙大纛而不思盡其職或拓田華第厚殖珍貨而不思取以義或任俠跌踢意氣自負而不能檢以法或狂誕遺世虛無高遠而不能揆以理不盡其職則責繼焉不取以義則怨萃焉豪而不制則敗放而不反則亂曰責曰怨曰敗曰亂其為憂至矣聖人疏食飲水樂在其中顏子學聖人簞食瓢飲不改其樂道之在理之得也士之勵行者毫釐之惡不萌於心跬步之頃不離於正則吾一身豈不體安而氣平乎事

親而能孝事長而能弟撫下而能慈則吾一家豈不上和而下睦乎其施於人也大而陶宇宙於太和小而一郡邑舉受吾惠至於窮居不見講道讀書俯仰天地亦復終日欣欣蓋所為皆善則無所往而不得其樂也東平王蒼之言曰為善最樂此之謂也鹿崖邢公蚤著才諧歷臺閣出典大郡歸因世居撤弊構新宏敞合度題以樂善徵文其中有壬佐吏部鹿崖為正郎能盡其職者也其得為善之樂者乎晚始得子風骨可愛易曰積善之家必餘慶則又將及子孫而無窮為善之樂庸有既乎書以為後人勸

瞻綠亭記

蕪水東橋曰綠楊蘭溪倚之清泉迤之眉山長公游訪地也山曰鳳樓久安藩君隱焉居之際悉樹以竹子西溪構亭其中扁以菴翠西溪子仁彥賓請于迂軒涼國公公大書瞻綠以易其舊於是

持以來請曰仁得公翰墨為榮元老尊嚴不敢復有請願剖其義有壬伏觀公之筆法道嚴而又窺其取義之遠也其有取義於衛風瞻彼淇澳綠竹猗猗之義乎竹之為植君子貴之所寓不同焉得其外者昧其內識其粗者遺其精一碧萬竿沐烟滌雨冰玉不足以喻其潔逃俗之士棲遲寄懷者取焉不過為景物役爾昔之扁是也其體之不撓節之不渝善若至矣而大者未盡焉若夫觀感之頃資以進修其詩人之旨乎昔衛人美武公之德見竹生美感發而為詩不徒美而已也繼之之辭曰有斐君子如切如磋如琢如磨謂其學問自修之進益也三百篇一言以蔽者心法也六義多草木淇澳之竹獨以興為學者教法也猗猗而青青而如簞其進有漸而其成有至乎所以示學者入德進德明且要也子貢引之而見稱大學申之而為傳其示人之旨益深切矣古之

為學一日在世一日不已武公年九十有五猶箴儆于國以求戒訓其學者百世之師乎彥賓壯年進進方未已瞻其綠則思其興之託場然自警景物滿前不能吾役也今以注書為風紀知薦調寶慶儒學正惟敦學半仕優則學子尚有望焉

南山亭記

貴溪夏君明進既葬其親南山之陽遣子元棟走京師請曰南山去家才五里山形迴環風藏氣完良田下抱清泉流潤冬夏不竭左右映帶嘉禾修竹奇峯怪石不可殫數作亭其側以為拜掃休息之地一言華之則榮幸及地下矣余聞而復之曰而父卜宅兆而葬其親禮也予尚何言然予習於葬者也試為子言中原地厚而夷易措也大江而南山水居地七八甌窶汙邪又居其半故必慎擇其地一域之內僅一窳或二三爾否則必有水泉螻蟻之患歲

時展省東西馳騫甚有至他郡數百里外者其亦不得已也哉昔朝議欲天下通行扶葬之制而區區抗論以為不可者其以是也孝子卜擇得佳地遠近不校也得佳地又近其居若明進可以為說矣若夫嘉木修竹奇峯怪石亦有與於是乎人子有終身之喪四時變易隨地感觸况見荆榛蔓草酸風苦月有不為之心摧肝裂者乎木也竹也峯也石也亦有可說者乎昔人以思名亭最其孝而益其思得名之正者也南山之名因其地也親葬之地聞其名親斯在焉况即其地乎即其地與親邇矣况登其亭乎况觀其扁而提撕之助益有所感乎則南山之名其有益於孝思者哉若是則木也石也竹也峯也不能撓吾之思矣不宣不能撓吾之思也將由南山之扁亦有以發吾之思矣願孝子之心所存何如爾元棟歸以語而翁請以是記之如何元棟曰唯書以畀之

一中堂記

吳君之文佐郡有特操作邑有惠政任劇有剗割之才為兩淮轉運判官予實都轉運使俄入參議中書其自修之功不知也予自政府得請南歸其子允拜予汝水之濱以昔尹文安去思碑拜而請曰翁歷履此其槩也維楊終更僦屋以居有堂題曰一中所以自修而教不肖者不敢弛也微教言歸獻翁必樂允庶幾養志萬一哉余善其請且知之文之自修不侈於小成欲進乎道義之域為之說曰一也中也聖賢道統之所係也果有見於二語乎將有見於一之中乎抑用力而一於中乎若夫有見於一之中則邵子所謂一中分造化者也一為主而中其內也用力而一於中則中為主而一其力也之文其用力而一於中者乎中者無所偏倚無過不及之名也存乎內者得其正發之外者無不中矣存乎內造

次之頃顛沛之際念茲在茲無少間斷是之謂一也發之外則飲食起居語默舉措無往而不合於中一其力以致於中致於中以驗其一希賢希聖事也况淑一家而效一官哉世之髦於鉛槧而汨於醉夢狃於董習而安於淺陋者未有問道於是途者也其有問道於是途不以其道之正告之而姑就其所能使之冥索背馳以終其身者則亦不仁之甚哉語不云乎可與言而不與之言失人予於之文不夫人矣

追遠堂記

亞中大夫彰德路總管致仕盍公既葬之四年予承務郎襄陽等處營田副提舉可大即其居作祠堂顏曰追遠語不云乎慎終追遠民德歸厚矣懿哉名也可大能慎其終斯能追遠矣然遠非一義也况族大而遠者乎盍氏自隋唐居上黨五季板蕩遷臨漳莫

詳其世六世祖浩至彰德公秩然有序而上黨馮村邱壠故在地為磴級與山高下凡百餘畝老松五百餘株碑剝落不可讀子孫尚四十家可大嘗往展省會其族而不能序其次也臨漳田村之兆喬木古柳鬱乎蒼蒼浩生取取生鉉鉉生圭仕至彰德總管府經歷葬安陽司空原六子第三曰居仁生渙彰德公也守磁州有惠政盍氏之先居上黨不知幾世而遷於臨漳自臨漳又至安陽兩堊之族不知其幾人又舉上黨之族而計之則不可勝計矣臨漳吾族也上黨亦吾族也舉不可勝計之族而泝之則其始一人之身一人之身而至於千萬人勢也推千萬人而至於一人則其為追遠至矣固不可以服盡親盡論也說者謂追遠者祭盡其誠此可大之能者又曰遠者人之所易忘也而能追之厚之道也以此自為則己之德厚下民化之其德亦歸於厚此余所望於可大者

可大年富力強致力於是其志可見已故予不敢以常人望之而撫其家乘之要中以追遠之大者為之記以復其請焉後之追遠者將取法於可大矣

一真堂

達為良相窮為良醫地不同活人一也非其良則殺人亦一也人病不同惟良醫為能知其宜故在膚而汗滿實而瀉虛者補之高者越之慄悍者為按摩滯痿者為導引寒奪者為灸熯擊痺者為鍼刺實結者為砭不仁者為醪醴而血氣凝泣者又有熨藥馬盧扁既逝法多不傳行於世者獨藥與針耳又有越其簡要獨事針刺者其言曰藥有真偽人有貧富地有城市田野之殊時有兵荒盜謐之異必藥療人是求三年之艾於一時為此言者明其術亦足療人視古醫道則未備也太師竇先生之未過也懷其學無所

施閩人札瘥針法極其妙施諸治療莫不即愈兵荒中活人不知其幾及見世皇陳三綱五常之道人道既立相安而並生其為活人又什百千萬於針矣天下之言針者一以太師為宗而標榜求售者皆自稱門人焉余多病得請歸首以詢醫為事卜居上壽里有榜其門曰醫者方自喜幸俄白首儒服攜酒來行里門之禮乃老醫博文張先生也博文之師教授鄭與子玉者嘗館太師於家真得其傳而博文則親傳於子玉者源之正流之不弛故施於用其效可必也家人有病者博文診之曰此不必藥當自愈又曰吾藥攻病無病不可用也凡醫必出藥為攫糈計且曰無病當備吾藥可預服也有當病而不藥又教以無病不藥者乎博文其賢矣人言博文善用酷烈劑聞而質之乃曰遇其病即用其劑過其病而不用其劑則與無病而強之以藥者等矣予聞而益賢之有堂扁曰一真請為之說真之為義大矣哉針法得其真則治病不謬診病識其真則用針不忒製藥得其真則施用不悖無所往而不一於真而又始終濟之以一心之真則活人之功又豈下於相哉余待罪中書久蓋深有愧於博文者也書其實以為記且以識余愧云

筠齋記

泰定丁卯先公捐館京師先友江南者夸山水之勝勸扶柩南且颯以地京師者則曰西山有佳地子南北無恒產不幸罹荼毒於斯斯亦妥靈之地也亦有指以地者而鄉里士大夫則不然其尤有意者至忿然曰子欲子孫浮華則南欲因京師富貴則北我知者父母邦爾荒迷中神魂無主三議闔胸中太夫人泣而言曰我平生作夢無一不在鄉里兒其決哉議遂決既膏殯走湯陰拜先

瑩不獨苦勞而亦狹不容寵矣從教授緹君允中改卜焉安陽城西山水靡不履歷始得武官原洹水之陽今阡而定畫遷措皆允中為之允中學儒者也盡去俗師荒唐禍福之說壬申太夫人歸葬得其人益詳蓋外方內恭安命之士也戊寅予得請歸請記其齋曰筠者余知其安於所遇而驗其才可施用束於冷局也扁筠之義其有不可自揜者乎古今人例喜言竹居必種植詩必託興其性若節言之備矣以言其用則簡牘箭筈箎簫笙簧篋篋篋席纜維滕絡之屬皆事也而其用之尤切者筠焉記言竹箭之有筠筠竹膚之堅者也竹寒暑一致守雖在節槩捍襲護使不能干其內則筠之功焉若蔑席篋篋纜維滕絡獨析其膚爾肉則薪也而簡牘箭筈箎簫笙簧篋篋篋席中幽閑曠適託於竹而已不知允中可施於用若竹之有筠也余不能施允中於用念其有力於先瑩記其詳以志其交之始聲其才以待世之用者焉

皆山亭記

昔宋之不綱也權臣握國軸以軋善類鉗天下口盡斥異己者而人心天理詩書功力決人肌骨有雷霆不能怖賁育不能奪者焉當時時文弊極世因一以為無用之學特庸人急祿者所為爾豪傑不弊也故有假對策以痛斥時政力詆權姦死生禍福有不恤者謂時文盡弊可乎廣信熊松能信甫咸淳辛未中省以策得賈不預廷試賈既敗以國子正字召辭至元後戊寅其曾孫光來京師始奉家乘來記其父皆山亭余因得其世焉信甫從湯文清公讀書交謝疊山以氣節相高既為賈擯隱居石梁山下著書誨人學者尊之稱為石梁先生先生生應制伯韶甫丁南北始一之會以

琴書娛其親或勸之仕而屈以吏辭而歸石梁先生歿作樓所居之東號曰對山蓋石梁在其前對山如見其親也伯韶歿于子良仲英甫作亭曰皆山亦以志其孝思而名之之意則主於石梁馬龜山龍蟠在其東西山雙峯在其西鬱乎其左右前後也孝子之心身之所在親之所在也故於羹於墻皆見焉况親之所居名之所屬而日接於目者乎自石梁而為對山自對山而為皆山皆山之望對山對山之望石梁皆此意也而天下之山皆可感觸雖無山之地亦猶有山焉非與世之役景物而標榜自高者比也余聞石梁之高不過數十仞有泉出其麓流而為溪灌田為膏腴者五六十里其亦有所象乎初石梁先生以正學勁氣不屈於世而能力詆元惡召為國子正字不就而流澤汪濊子孫蕃衍詩書濟世其猶石梁之出泉乎而當時腴者子孫盛衰吾雖不能悉究而亦可以必其不能也熊氏自江陵遷洪曰宗尚志甫者政和中登第仕至中奉大夫樞密院檢討南渡後又自洪遷廣信信甫其五世孫也居是者二百年至先則九世矣又能章父之孝詩曰永言孝思孝思維則熊氏世有之矣

記

五峯院記

襄垣東北六十里山曰五峯巖岫深窈環拱可畫天朝丙申歲僧道顏游歷憇此目繫清勝慨然屋之因山而名焉法喜嗣居席舊無廢至致昌者遂侈其院而有加焉景貲峙糧撤弊構新殿寢渠渠采絢焜煌金像潔新從神有位翼舍輦飛講筵靚深長廊結砌雨不泥屨齋厨廩庫百器皆備里社為之改觀因其邑人從余學者張碧來請記夫釋氏為宏闊勝大之言以誘勸愚俗者非一而其徒尤長於侈屋蓋其設心之專強厲堅忍死復有繼故其成也不例人之所難且車廬冶臬鞞雕陶范以辨民器工之事也畎畝樹藝饒腴雜殖以長地財農之職也廢舉懋遷通異待無以資

人用商之為也是三者莫不盡力殫苦以衣其寒以飯其飢至於五畝之宅一廛之居晝茅夕綯勤劬備至而後有以僅庇風雨其備隙共藩而居者又不知其幾人也今夫深山大澤人迹迥絕之地或巉巖峭立或洲渚浮出緇衣一顧曾未歲月而巍巍千楹湧出於地豈所謂佛者果有以陰相之耶將倥侗顯蒙求欲如志而甘其誘耶抑設心之專有以成之耶佛之相吾不知以彼之求合吾之專屋不足侈矣吾聞世有偷容避役酗酒貪縱者雖棘生蓮座溜漫佛面而蔑不知恤政昌渾然其質而能有為如此蓋所謂設心之專而能成其事者也即其人書其實可無取乎曰政昇政吳皆其徒也文明者又政昌之嗣云

芸窻記

瀏陽山水深秀實最潭屬文風士氣又軋湘部齊民工巧亦他郡

莫及余早獲友其傑詢凡游者遂習於聞卜君瑞卿世居七寶峯擅溪山之勝請記其室曰芸窻者士藏修一室已足固無事觀美也力苟可及清潔靚深非過也然一室幘幘不有開明晝且如夕窻有取焉故曰窻聰也於內見外之聰明也芸香草也何居乎其以香草之名其窻乎古人有圭竇甕牖束於貧也綾綺連錢詠於華也瑞卿華不至侈貧不至陋而託義又有比焉騷則留夷揭車申椒辟芷之屬昭其具也芸兼用焉漢種蘭臺石室書府取其避蠹也晉室乾入畦則獨取其具爾瑞卿將取其具乎抑取其用乎余因有以邕君之學矣夫一室取明窻其地也一身取明心其窻焉衆緒紛紜而見於前萬事醇酢而出於中涵養不素則見有不蔽而出有不窒乎瑞卿觀乎窻必有以求諸心觀乎芸則不獨美其具又將致辟蠹之用焉君之學於是周已雖然蠹書蠹之小者

也聖人正學百家蠹之天民良知二氏蠹之生人膏血貪吏蠹之天下紀綱奸邪蠹之是皆芸憲讀書日所講求者也士一旦出而用世亦思所以辟此乎瑞卿出五代司徒天倪後族至千餘家世多顯人余不獲考其譜而知乃遠祖在孔門四科者其思學之又將八面其憲伺萬物之蠹而辟之焉語非其職以過高難行予其悖哉為學者設也學舍是非學也尚勉之哉

竹軒記

士生世析圭儋爵獲摠厥蘊至於晚節進退所以收幼壯之成功者尤不可不慎也禮大夫七十而致仕蓋憫其勞久力憊不敢煩以政士難進易退義苟當去浩然莫留各盡其道矣廉恥不張乃有膠榮而諱耄者其愈下者羅列選籍僥倖萬一於是司選計仕年大書其籍曰致仕至有廷辯謂筆吏考錄之誤者風俗至是

果孰使之然哉昔叨左司宰相稱吾鄉續公景明之賢擢禮部員外郎尋陞懷慶路總管至則值歲大饑勸分不足發公廩以賑國制粟幣無上文毫粒不出乃謂僚佐之尼者曰吾任牧寄俟得請皆餓莩矣有責願獨坐又止其租稅報下皆允天歷初郡直兵衝飛輓萬計軍興不乏西兵入境官吏星奔獨守境土過流竄兵罷吏民安堵即投綬歸而身未衰年未及也至順壬申以嘉議大夫禮部尚書致仕闢齋所居植竹數本扁曰竹軒竹之為植冰霜凌虐而色不改凡卉彫盡而守益堅有節若是故君子貴之人平居氣溢志驕纔少摧抑隕獲殆盡過變而不失其守者鮮矣尚書掾左曹已有聲若司程綺源覆實儀曹之剽繁知陵州之善政人能道之若夫遇變而不失其守時可安享而勇棄之則進退之際明矣嗟夫富貴多憂之資也世途設險之窞也道義不明而能保始

終無悔吝者幾希鐘鳴漏盡而不止行百里躓九十者接迹焉則身未衰年未及而退者不賢能之乎然世有以官為家退無所於歸者尚書退有歸守先壠課子書又天厚其生而成其志也竹之稱古今實繁獨以其節有類故樂記之以為魯多君子之徵焉

綱齋記

古人不作無益几杖有銘寓戒也况施於身者乎士名而字復益以號沿昔汎今汗漫一軌卒不能已取不悖理而已矣昔有名德俱盛門人後世名若慢之字若等之即其山川指實也從而稱之已不自號而人號之也其取號者取諸山川指實也從而飾之務奇也說以自暴玩世也擇義可訓揭之室堂者自勗也號而擇義可訓以自勗者殆庶幾乎北庭納璘普華登上第倅潭之湘陰以宇文燦乃扁所居曰綱齋雖不自號而人實號之矣於是請文以記

君質美而濟以文年少而華以官燦如其光赫如其聲吾懼其外而不知其內也觀其所擇喜為之說曰易稱美在其中而暢於四支發於事業又曰剛健篤實輝光日新其德則是未始不欲著也子思中庸末章言無聲無臭之極功六引詩而首以衣錦尚絅繼以惡其文之著也發之豈故欲蔽其光輝而立為異說哉誠以學為己者力求諸心知不知在人人所不知而能慎之人所共知而能晦之猶衣錦之美雖有蔽之而文采日章非故蔽其光輝也致力於內不暇於外爾致飾於外而無以繼締續炫耀內實緼蔽此君子小人之分內與外之間也吾聞君之為政也刊其華而力於實泯其迹而慎於行法公乎心惠及乎人上官不知不恤也其有得於綱之義乎彼中貪而外廉行悍而示慈釣聲名汲汲若不及究其實蓋漠如也夫珠在淵而川媚玉在石而山輝吾又懼君之實

不能掩聞乎時而暴於天下將不滯於一州矣雖然此特末也君以經學起家綱之大者當自知之吾不敢贅言

雲莊記

至治辛酉有壬佐天官幕交一時達官竊置淑慝胸中當橫流奔衝瀾倒風靡而工部尚書咬公正德人獨以不倚稱之俄除福建閩海道肅政廉訪使有壬同時為南臺監察御史由是契闊至順壬申有壬有事先瑩正德由河南省參知政事改西臺侍御史以昔嘗貳守吾郡因僦居焉駟請再三竟以疾辭居相去十里許過輒窮日不能舍於是知昔之所知才十之一二爾所居圖書不去手讀二氏書而擷其要援筆戲作山水畫圖遂臻其妙人終身功刀旬月盡之嘗謂余曰斯土吾雖樂而無由為經久計房山金奉先縣山川明秀明昌間為清暑地北瞰居庸蘄絕雄偉西則太行

如畫中多古剎琳宇在畿甸之內而窈然霄壤之異也邑南二里清泉縈抱林木果蔬土沃景勝予結廬其間有田有園時時出游歸馬上望吾廬杳靄隱見在白雲中千態萬狀不可形喻而予心若有所得因名曰雲莊將為菟裘也予其記之予復之曰雲之說有二悠悠太空自捲自舒邈乎無心者浮雲也視富貴不義者取焉起膚寸而雨天下回生意於枯槁者雲之用也不知正德視富貴如浮雲乎抑將自膚寸而雨天下乎正德世出貴胄威貌氏歷三臺御史十七轉為今官年方強仕雖恬淡樂閑而世方急賢如渴望油然而作者不得辭也他日斂功而歸撫蒼松臨清流乘白雲而徜徉乎山林房山之英必不敢言欺我雲壑正德曰余所以取名於雲者為山中之景物爾二說余皆不知也予曰知不知在公姑記其槩俟他日驗之

存心齋記

士為學一於己人不與焉至於處不順之際則學力淺深從可見矣夫不順之來其處之也有漠如浮雲倏如飄風泯然若不見而不聞者或實怠缺亦罔自反委物我混是非流而為荒唐寂滅之學為己者固如是乎復有致力容忍如飢禁食如斲受楚堅制不動而悻悻者固在又若懲忿忿而實非也欲去二弊莫若師孟子以仁存心以禮存心愛敬此施效驗彼著橫逆之至自反再三內省不疚在人者吾何與焉尚論古之犯而不校者顏子其成德乎若婁師德之唾面不拭不幾於矯乎呂蒙正不問毀者姓名以為一知則終身不能忘是不能消融以理畏避有聞寧不知之為愈也或一知之胸中之芥蒂將不復可釋矣不知孟子處之有至善之道焉廬陵王務先君子人也他郡知其賢以禮邀致館而師之先

廬在鄉里為里豪所吞歸則舉室皇皇別購隙地盡瘁經營始有以庇風雨即東室為遊息所撫孟子處橫逆之旨揭以存心俾余發其槩竊惟士為學觀孟子反覆之精密一有不盡謂吾仁吾禮若是足矣則橫逆為患非不幸也宜也則是舉妄人而施諸身也務先之自反審矣尚慮其悻悻者在未能渙然而釋也務先曰余每懷舊物不能不為之痛心鬱悒固若悻悻者在循名惟義所以自釋也又恐用力者有不至旦夕顧瞻而致察焉又所以自勉也予曰不能不鬱悒者人之情也顧瞻而致察焉自反再三之謂也務先其善學孟子者乎彼蒙於忿懲者聞之獨無開明之時乎則其悔悟而反璧也有日矣務先則劉凝之乎為沈麟士乎予又以是驗務先之學力焉

記畫

長安劉子允蓄古畫一軸女冠有承頤而行者持便面者簪者褰者手見者袖者而六人之冠三有冒焉道士肅迎者二人篚篚盤盃盃壺炷銚之屬錯列俎上下俎端據質而切者一人旁有焚願不去袒割而迴視者一人扶而挹者二人黃袍若王者持杯中坐一道士捋鬚坐王之左脫冠以簪搔者一人裸撫掌者一人袒腹而笛者一人捩僧耳飲之者二人杖而立者一人跣而舞者一人手籠餅來者一人一人蹲而酌飲於前一人袒踞從索其後一人袒跣而掩鼻比一僧啣杯而舞坐王右者一僧羯鼓一僧執拍道士掖琴俯坐者一人左杯右筋者一人露頂右袒跣跌而飲者一人加以冠且擁使引滿者一人坐而攬其肘者一人袒而阮者一人了而據地假寐者一人卧而曳之使起者二人醉乘騾足加其麓者一人騾嗅糞不前持鞭而牽者一人乘牛者一人徒而扶者

各一人執鞭而欲爭者一人牽騾而止其爭者一人女子垂髻攝衣奮欲鬪執鞭者一人女冠引其臂止之者一人立觀者一人負醉女携墮履後捧其足者又三人為人五十五王居其一僧四女人十二餘皆世所謂道士惟杖立者少異焉地無宮室臺榭茵半虎豹飲食之具六十有七與夫一木一石皆盡其妙余見而訝之知其為良工筆而不知其為何人持以扣人亦莫有能名者昔荒場與僧尼道士女冠連席酣宴靡所不至場不足譏也此何王也異端之徒滿前極諸醜褻成儀之喪乃至於是視舍坐號呶播播怩怩者又什伯千萬矣古豈真有是耶抑畫師善戲而為之也余病不博覽無從考識因思京師舊俗鬻扇畫事率隱僻相勝有十識其八者得一扇予時少年意謂但不屑往耳往當日有得也由今觀之幸昔不往往未必有得也畫歸之劉記其槩以俟博識者問

焉

德齋記

吾鄉老成云逝繩武有待投劾歸思見其人而多病却掃交接未洽其居密邇而隱居教授者得陸君仲容焉仲容為人靜而專授徒二十年不改業名齋以德請記於予余固嘉其靜專及見其扁又知其為為己者也乃語之曰先儒訓德有二其曰得乎天而虛靈不昧具眾理應萬事者言德之本然也其曰德之為言得也行道而有得於心者修為以復其德者也德之本然推聖人為能修為以復則學者事也之名也其有取修為以復者乎吾為子究言之天下之達道五所以行之者三蓋五典天之所叙雖天下古今之所共由然非智無以知此也非仁無以體此也非勇無以強此也知而能體體而能強則五典之道各得其理矣是理也天之所

以與我我所以為德者故曰行道而有得於心且得者失之反也得於心而不失乃為真得日一至月一至造其域而不能久謂之有得可乎雖然又不可躡等求也而有序焉學弗能力弗篤而弗肯措也此之謂進德一簣之覆以階九仞此之謂積德克實光輝而暢於四支發於事業此之謂成德德之時用大矣哉仲容進而積積而至於成成而見於用而後為無負於名齋之意仲容勉乎哉

記六

記遊

宋柳仲塗居蕩陰聞桂林僧惟深言林慮天平山泉石過衡岳遠甚及同遊始信不妄余幼讀書江南既服役狂走中外雖兩歸鄉里而憂患荒迷世故縈繞望西山如天上不得至也至元四年戊寅歲得請歸九月三日甲子暨監郡西域荀公和叔始為林慮之行午出西水門過孫平邨村芋區蔬畦星布彌望柿林如江南橘黃時遠近蔽虧歷流寺固縣俄水冶士大夫巡徼監當官孝親寺僧皆來迓晚宿寺沙門西溪年八十八尚能款客明日拜衛國忠獻韓公父諫議公墳讀富鄭公撰神道碑銘碑亭皆完石極大而美陰有樹形若水墨畫大塚皆甃甃兵荒中僧紀奮身捍蔽卒賴

其力宅兆形勢風水家圖為式憑高周覽高下隱顯與圖不異也顧豐安衛公兆域寺燬於兵僧徒解散豪右伐木野人盜斃殘毀幾盡則紀之功可念也昔衛公以大功德為宋社稷臣兩兆寺皆勅額以之主視而一得一否亦人力之所不能及者乎小酌遂行林州知州李祐之延率其屬迓止州萬安寺又明日謁廟學游黃華山和叔祭其故人不能從別駕梁思誠仲信諸生李冕齮齮輩偕行十餘里至其麓皆小石榭檜是日大霜水皆冰人謂高寒較他地早一月榭葉青紅可愛路漸高聞水聲灌叢亂石中既深入山益高壁益峭路益險水聲益大峯回路轉掩抱重疊使人應接不暇澗皆盤石高下為級泉流其上懸而為練激而為湍飛花旋碧喧豗飄洒其緒而為泓者清澈如空纖介可見又十里抵慈明院山僧三四輩問以古皆不知石柱刻張商英詩言高歡清暑事

蓋清暑殿基在院西北挿天峯下而亦不能必其是否也他在刻多漫滅不可盡讀大率多崇觀間人院之南仙人王津母墓若祠在焉少憩遂入山觀水簾一僧前導山民十餘持斧鉞剪樞鬚撮碎石僅可投足馬不負人且不能登陟憊極又騎不幾步又下如是者逾三里許遂不可騎矣始見懸瀑如練於半天騎留林石間相率牽擁而登焉樛木蒙密亂石犖确峻坂微徑如梯而無級賴健卒紉練於前挽之而進因憶東漢封禪記語蓋近似焉數問僧以僧言遠近為喜畏又三里許逾公主關始至加遠蓋不能進矣石屏突出四無所屬其高入雲曰浮圖峯金王子端詩所謂掛鏡臺者也臺前有盤石疲甚坐其上伸信年六十懼不任登陟留之院我亦膝屨掖兩卒至又迷路枉里許石上望瀑北僅如匹練濺崖飛白始闔西崖垂白亦不過文許憶昔人傳誇過實俄從卒持

冰柱長五尺許云得之瀑下盛稱其偉始欲印之發火煮酒引滿
遍飲從者乃緣南崖微逕迤邐而西坂極峻草木皆冰跬步喘喘
至西崖下仰之目力為極始見崖瀑飛洒散布疎密勻整下至澗
長不知幾百丈闊蓋百餘尺光明透徹去人尚五丈許昔人號迸
珠簾不能盡其奇也負崖坐石伸信又跼蹐以酒至力稍甦攀援
而北伸信不能從也獨遣其卒挈酒脯以從北有岩容數十人瀑
長過西而東又濃厚時如團雪投墜連屬不斷加以動搖如玉龍
飛舞也與西同兩簾皆清寒襲人時時飛洒如細雪著人面下沾
細草皆為清水日夕凝積或聳直如玉笋或扶疎如珊瑚蔽崖彌
澗奇形異狀不可殫述瓊田瑤草殆謂此焉信天下之奇觀也西
崖望掛鏡臺則培塿矣茲山奇峯重疊如展畫屏不知高掛鏡臺
又幾百尺周圍環抱而開豁其東臺如門屏而位置偏南臺上石

墜者皆方平為水波狀臺前之山一遮一掩又不知其幾百重也
始坐盤石疑瀑之小蓋遼遠空闊掩映岩石淡然如無加以老目
茫茫故也歸途趨下差覺易僧醉喜甚捧冰如珊瑚者前行騶卒
皆折紅樹負之而趨至繫馬所且乘且步俄至院坐山門前大盤
石取山菓如丹砂者與僧持冰若紅樹羅列於前清泉冷冷過壺觴
間且漱且盥且觴且詠非迫於暮不忍歸也和叔率州官載酒迓
出水簾泉淪茗飲之又明日偕和叔之延判官張士謙子敬游墨
竈山寺殿東椒壁有梅軒佚老貞元癸酉歲題字文皆奇惜殘缺
過半石柱皆送人題名緣石磴登方丈鳴箏小酌從者得雉為炙
以侑觴題詩東壁出遂至硤峪山寶嚴寺寺東二里支提龕琢石
崖為之開元十九年蔡景撰碑剝刻甚精寺前泉石不減黃華山
門有白松皮葉皆異巨槐蔭地數畝故聖燈寺在西北絕頂望之隱

隱見其殿宇僧云蓋四十里之遙舊傳聖燈誠禱則見張商英有
記後見者多自矜和叔云某官大缺人望禱亦見余不禱也歷石
磴登方丈望五松亭方丈西古松下坐盤石得山尤佳奇峯疊障
競秀環峙上摩穹蒼錯以紅樹菴畫所不及午和叔治具張樂夜
分始休泉瀧瀧循殿階流夢回清響滿耳可以消酒戍辰刻名後
殿石柱夜和叔入浴余獨乘月登陟坐盤石僧普靜精感篋終日獻
藝至是挈其徒按羯鼓笙笛鏗鉤震盪交奏迭作月明松影中清
風颼然山鳴谷應不知此身之在人世也長老勝祥又進數尊而
歸寢視歐謝遊嵩山見汪僧雖靜竦不同而所遇皆可樂也山之
秀拔在黃華石若夫水簾奇偉遮掩環抱重疊深遠則不及焉二
山之泉皆去山數里洑入地中己已將遊棲霞和叔謂無大奇遂
東回過諸翟翟曲宿下洹九日登鳳臺山山在洹水陰峭拔如鳳

聳石為兩翼各有亭山巔又為亭亭上又架屋兩重金泰和間作
祠三神女山多古柏路尤峻坐其巔俯瞰二亭若井底風急不可
久過南齊觀丈八石佛有紹聖間石刻度槎牙嶺不可騎和叔徒
步憊甚間關至善應宿儲祥宮明日登西樓和元裕之詩得鯉鯽
活躍几席前泛舟觀泉泉皆洹之狀至是突出有若歷下趵流而
清澈過之登龍祠祠下泉出尤怒飲舟中道士又携酒竦水濱遂
至醉又明日道人方擊雲璈俯觴盤桓殿廡二人報大尹杜公弘
道輩逐已二日不得已遂歸往反九日游歷四百里清賞之餘則
有從者弦歌馬上憊疲則聽和叔劇談可以遣睡餘力所及得詩
凡二十八首姑錄之以誌歲月昔仲塗述遊有記衛公有跋而衛
公凡三字相竟不克往予竊自幸多矣所不足者和叔謂天平險
甚且經大雨不可行棲霞又尼於猶豫而玉泉澤陽諸山皆西山

之勝未恆窮歷張本於是尚有待於他日焉

漢陽府學新築宮牆記

治之要在學學之要在人師儒也風紀也我元建學徧天下師儒教之風紀勵之大而成俗出才細而繕葺悉任焉苟非其人細亦不舉大復奚望士為學有地地之治不見人之謹情漢陽學垣昔皆土築霖潦歲圯至元辛卯知府戎益教授劉必大易以板屋木久又腐雞犬不禁天歷己巳夏僉憲楊煥謁廟嗟訝力欲繕完商工計材費等劄作乃議甃址而瓦覆之費雖加倍校以歲修吏因為弊省反倍百時學廩告竭命判官夏文炳倡率其屬教授劉謙適至協志經營凡五閱月百堵俱興學南地隘神人一門出入賁甚作學門於東牆西地偃豬穢入泮池甃石為防池浚而廣北泄以溝墻之費悉資他助門池則半出學廩廟有巖而學始完矣今

夫齊氏之家必開垣局鑄以為防也聖人南面而頽垣敗壁豈稱王居既廩祭養慢藏其可斯役蓋不容已也况土而木木而甃歷數政而後討論始盡過其人而後有成天下之事可易言哉士子謂紀今範後子宜有辭有至於是因有以告吾士焉記以墻作請以墻喻子貢稱夫子之墻數仞言夫子之道也學者必求其門入而有見則其為學也至矣不得其門未有所見其猶正墻面而立也與若夫糞土不可朽者聖人之誅至矣吾士其念之哉墻縱五十丈橫半之楮幣為緡四千五十瓦二萬八千九百甃四萬二千墼二萬二千四百甃蘘椽桷瓦礫之屬稱是木工六十六坊之工三百一十築椽之工五百六十縣尹程來實相斯役云

崇門記

至元後戊寅夏杜侯來守彰德方旱禱而雨槁苗用蘇秋大雨乃

不止田將沒洹之漲且及城八月四日侯禱於城東門雨俄息翼日遂霽按祭法雩禱祭水旱也歷代典制州郡縣苦雨各禱其城門雨而禱門古禮也長人者以禮為政則觀感而化者深矣世之為郡邑者遇水旱未嘗無禱而事不師古俚俗是徇以禮為政非學於古訓者不能也侯學儒者也歷階通貴出守一郡禱之不淫一事爾而有見其為政之大節焉士民合辭請曰侯之雨公記之五龍廟今茲淫而止猶昔之旱而雨也旱而雨有記淫而止無記其何以彰侯之休侯聞而辭曰禱雨我也禱晴又我也我不職名泚而屑屑瀆夫造物者尚敢夸哉余曰昔旱而雨天也今淫而止亦天也惟其有侯之禱則有旱而雨淫而止之天也微侯之禱寧知不旱而旱雨而雨乎苟無此理則周制不著於春官歷代不見之典制矣侯為今守惟古是師使跳巫舞覯之風不見於吾鄉挈

民視聽舉納於正以其平昔之所存施於一念之所用而又合乎典禮之正天道不遠矣郡之人不能忘侯而吾不能拒鄉人之請書以最後來者

疇齋記

益陽袁君名其齋曰疇來徵余言余按字書疇本作耄耕治之田也象竝畔之形引而伸之則為疇類之疇洪範九疇是也又為誰何之義疇咨若余采是也之齋之願也其耕治之義乎士之為學蚤作而夜思勤力而勞心猶農之治田用天因地昏於作勞則樹藝可施焉仁義禮智根於心養於未發之先察於已發之後除惡務本樞苗必戒苗而秀秀而實矣傳曰五穀種之美者也苟為不熟不如羨稗人事不齊非疇之罪也人一己百愚明柔強况膏腴沃壤濟以勤力乎其崇如墉蓋有不期然而然者矣博學而約取

厚積而薄發余尚有望於君焉

萬國良九思齋記

君子有九思思者為學之要所以審其知而肇其行也天生烝民有物有則聖人從容中道固不待思大賢以下臨事必思使各當理當視也思不以一毫私意自蔽當聽也思不以一毫私意自窒正顏色則思溫動容貌則思恭出辭氣則思忠至於執事思敬有疑思問臨忿思難見得思義皆詳慮審處以求真是之歸焉然思之日亦非止於九而已也天下之事萬變不同此心之微衆理所具耳目之官不思而蔽於物心之官則思思則得之思曰睿睿作聖思乎思乎其聖學之要知行之樞機乎雖然九思之日昉於夫子一時之論而實原於洪範之五事也五事之思偏言則一事專言則貫四者夫子因貌言視聽而推廣之且揭思之一字以為致力

之地其示人之意深矣有志於希聖者奚可外思以為學哉萬君國良以九思名齋蓋嘗致力於思者請言於余余嘉其筮仕簿領發無不當其有得於此者乎序其槩以勉其進

晉寧路鄉賢祠堂記

治民有政化民有禮政雖不可弛聖人不急也禮則不待親炙而有得於私淑者已惟其不得親而炙也世之君子汲汲有事於前修往行者所以寓淑人之機焉古鄉先生沒而祭於社鄉先生之德鄉人心說而誠服者其秩於祭宜哉世遠禮墜著於今有不舉者况成秩無文乎然其廢舉亦視所遇何如人爾鄉飲酒禮主人就先生而謀賓介主人謂諸侯之卿大夫先生謂致仕老於鄉里而教者大夫則就而謀之又卿大夫飲國中賢者諸侯卿大夫猶能致禮於鄉賢之生者天子牧守獨不能致禮於鄉賢之沒者乎

祭於社之制不可考附廟學作屋而祭之者則間有之矣晉宣在河東為古今名郡廟學罹地震仆而復建講堂西四賢堂故基獨蕪歲不治今總管仇侯理勞舉墜勸農敦學歲復告豐治捷桴鼓顧瞻隙地慨然捐俸金倡僚屬而復為堂焉經始至正二年孟春迄功二月乃取隋文中子而下凡若干人設主以祭前國子司業王君走書京師請記於愚愚惟萬物並育而不相害道並行而不相悖物之所以育者道也道之所以行者人也道之統在聖而其寄在賢或晦或明或絕或續有不得而殫論者大抵先王承天之道所以維人紀於萬世者禮而已矣禮之目有五而祭統乎吉然而有公於天下者先聖先師是也有專於一鄉者各賢其賢祀於其地者是也公於天下者以其道被天下也專於一鄉者道之所著莫先於鄉而鄉人之所感視衆人為尤易由是而國而天下

矣王豹處於淇而河西善謳繇駒處於高唐而齊右善歌曲藝且然而况為聖人之學者乎晉當變風變雅之餘有憂深思遠之意俗美且厚人生其間雖德之大小不同而位之顯晦亦異要其所至有足以任斯道之寄者若隋文中子若唐裴文忠公宋司馬文正公其出處勳德為何如他如裴宏中趙元鎮之相葉陽元宗司空表聖之節操趙伯循孫明復之經術與夫金源百年以迄我朝其行足以範世而軌俗其風足以廉頑而立懦其學足以垂後而淑人不待親炙而有得者多矣鄉先生之功不亦大乎生為晉人沒為晉神其秩於祭宜也然其中有從祀孔廟而又班之斯堂何哉從祀公於天下者也斯堂專於一鄉者也使薰德而善良者益寓其沒世不忘之思非黷也昔魏杜畿為河東太守開置學官執經教授郡中化之以多儒聞其功不在蜀文翁閔常充下而未聞

有祠今舉而祀之可也夫以陶唐之故墟際皇元之嘉會魁奇材
德之生蓋鼎鼎也明其晦續其絕廓聖人之學而任斯道之寄者
豈無其人又有祀而秩之者已侯燕人名濟字公度化民有禮其
杜畿之流乎司業名士元字善甫則郡人也

至正集卷第四十一終

至正集卷第四十二

記七

務本齋記

士盍觀夫水之與木乎水由涓滴為溝池為江河而放乎四海漑
浸功利古今不竭也木始毫末而拱把至昂霄聳壑大可梁柱明
堂細不失為椳闌扂楔無不適於用者何哉有本而已矣士之為
學其亦有所務乎士何務曰務本論語首篇所記皆務本首章聖
人言學後即繼以有子君子務本之言誠以根本既立如苗之於
根由是而生有不期然而然者矣務本齋者宋故衡安仁馬亨復
先生書室也亨復從北湖姚輔之受易而歸北湖以朱子書務本
洎誠齋著務本說為贈因以名其齋焉至元丙子燬於兵字若說
皆喪後至元丁丑孫熙明初即故基作屋介其友乞余書京師而

至正集卷第四十二

記七

二十六

明初未識也庚辰始識之長沙道同氣合遂辱留不忍去明初謂扁得於昔記不可靳於今也愚昧於剖析而不能拂其請昔子夏子張子游以有若似聖人曾子獨以為不可至有江漢秋陽之喻後之學者不能無疑焉然觀君子務本之言則其於聖人似矣人生有父母兄弟有子言務本始於孝弟則三綱五常悉由是出仁民愛物舉而措之爾此所謂本立而道生者猶水木之有本由是而至於其極也若夫天下事物有本有末則又對待之言也舍其本而趨其末者衆矣故愚因務本之說而旁及對待之言非悖也因有警焉故孝也者敬其本也養其末也未有事親以敬而不能養者也忠也者誠其本也事功其末也未有事君不欺而事功不立者也書以五經為本百家其末也通乎經則百家迎刃而解矣文章以理為本辭華其末也未有得於理而不得於辭者也引而

充之有本則有末學者知所先後其亦有益於為務本之學者乎亨復不幸才三十而卒子棧敬孚世其業長茂而實遠至明初則道之生也生生無窮矣愚不能有以益之也然竊誦大學曰自天子以至於庶人壹是皆以修身為本易曰復德之本也蓋修身則道立復則心不外而善端存故務本者又當先於修身而修身又當先於心不知誠齋之說如何何當一見而啟愚茅塞乎

大名路重建銅臺驛記

良二千石之作郡也其猶家乎古有之處官事如家事然後能盡吾之心旨哉言乎若近而實遠推而極之則治具之大小畢張矣夫宣化養民固其大者而吾部內關於政者一苟不備顧不瘵吾治乎民生粟布以禦飢寒屋以待風雨器以適用未有闕而不求敝而不修者也何獨至官事而若是愆哉且羣居往來自非匹夫

備屋未有不規函丈地以肅賓者况提封千里上有王人下有報政四方形李之往來則館舍非為政之先務乎大名在漢為魏郡後周為州唐始號大名府而宋建北京今為上路實河朔大郡也郡視古諸侯館人所職固當高閑閤厚墻垣以無憂容使而自後至元丁丑大水蕩圯賓至率假廛邸至正癸未九月河東廉訪副使朶解來監茲郡視民所欣戚及事之病益民者悉罷行之惟驛舍之地迨茲七年事上禮賓大惟弗稱即倡僚屬割俸金購材庀徒躬相厥役乃堂乃廡乃庖庫福廡洎食飲宴息之器物巨細畢具伴來願有述也余惟古者王使之至侯邦與夫承王命而為過賓者郊勞致館之儀饗餼芻薪之節官正蒞事上卿監之諸侯以正事出諸侯之大夫士以君命出或戾其所止或道其所由授館展車各有攸司賓至如歸莫不懷愛我國家際履極載悉入版圖

舟車所通傳置交貫事雖因古而法制之詳實過之侯甫下車輿廢補敝首復驛舍知所先後矣昔單襄公奉王命聘楚而經陳候人不在疆司里不授館有以知陳侯之失德晉文大諸侯之館巧人以時填館宮室鄭僑誦焉近代有刺韶州以創驛埃而立生祠宰萍鄉以驛傳完葺而受知天使則侯之是役可以觀政矣孫謙記襄城驛而謂州縣皆驛者以刺史縣令任之既輕變易又數其於為政則曰我即去何用如此則州縣真驛也彼視官如驛而侯視驛如家愚哲判矣故為記其顛末以示後之為政者

菊莊記

安陽地稱秀麗昔人引洹水注城內為園池環城之池晝夜湯湯民室酒壚擇奇居勝無慮數百區西南匯為陂溪山之翰委亭館舟楫之盛麗蒲荷葭柳羽鱗鯉互之饒益實最一郡水利不修民

生日劫陂遂為陸而亭館為墟矣好事者或事築植胥徒一假館
花蹂木戕器敗屋損供頓少弗愜有遂賈禍者故莫不恣其糜歲
而已焉余歸方事游嬉而無所於適送客南郭歸並闔閭而西微
行詰曲桑榆蔽翳負城有小圃徑造焉地僅餘百弓唐廡幽潔問
守者曰此王君季貞菊莊也雜花並植菊最多故以名時方挺翠
怒長羅列滿地愛之不忍歸秋風作花見餉十盆品色莫有同者
莖高尋丈花大徑三寸餘蓋培溉有時芟移有法半歲勤動而後
有成信菊之拔萃者也季貞知予同其愛介其友請言吾方慨吾
鄉風物之非昔而嬉游無所於適也能無情乎淵明曠達芥視軒
冕乃獨愛菊屢形詠歌至與松並稱茂叔談道有取於蓮並稱者
二富貴者在所薄菊獨以隱逸稱譜之評之者又代不絕口其貴
重可知已季貞其亦慕古人而有見於菊者乎人生之樂隨寓可

得口體居室不與焉故不他其藝以見其志不侈其圃以納其侮
百弓之地可游可樂胥徒貌之而不屑來沒吾齒莫有睨而視之
者求寡而獲豐身安而志遂是莊之得不亦多且久乎莊田舍也
田舍穀為稱首不莊於穀而莊於菊穀吾口之所切菊吾心之所
樂吾口宜緩而吾心不可不適也心適矣視如京如坻漠如也古
有午橋莊築山穿池竹木叢萃固盛德之宜居後之主者已墮屠
兒墓園之譏平泉莊之雁檜珠柏雖曰僅存尋亦蕪絕矣富貴田
宅之不可恃如是夫九原可作吾其從晚節之老圃乎且吾為人
莊而日就荒人為吾莊而不獲一稔獨幸得歸而時游王氏菊莊
庶幾鄉賢之萬一焉記菊莊而及鄉賢者高山仰止吾鄉之士其
勿以菊莊為嬉而已也

乾明寺記

余謝事歸里有寺曰乾明主僧德訓時過余既乃相告曰佛居西方以七寶為宮室中華事之每窮土木之役然茅屋越席神亦安之亦誠而已吾寺無貯儲業精者驕荒者怠驕與怠相遭濟之以貧寺日廢矣訓祝髮事佛主講若壇信者禮施豐約不敢校歲久積楮幣為緡萬五千有奇乃構大雄殿像設藻繪堂室庖福大小俱興經始至正甲申二月落以乙酉十月雖不足比隆傑刹計佛亦與其誠而安之矣且訓見吾徒競錐刀如市商惟私其身一旦捐衣鉢啟爭貽笑故就今尚健盡以奉佛焉公不我揮故敢以告其徒福祐德成復踵門請曰微師吾寺幾墜願紀於石相城故多寺由隋迄五季有興無廢周顯德中廢省存者僅二十而無所謂乾明者宋李回作郡志始列乾明禪院豈宋所建耶易院為寺又不知何時唐賜額者為寺私為招提蘭若若山臺野色皆是也佛

以清儉為宗其見勞人糜財果樂此乎昔之佛者斷薪續床把茅蓋頭未聞以締構雄侈為賢也長蘆宗頤師謂梁武之禍由崇奉不能清儉所致詎不信哉訓也居而能儉積而能散嗇於身而豐於佛懲其徒而矯其弊亦賢乎哉今海內名山寺據者十八九富埒王侯有興作猶資於眾因而利之此雖大小不侔而得失亦判然矣佛之說高者凌青天深者入黃泉其淺而近者曰不貧不癡訓也其庶乎余既聞訓之言又重違其徒之請求其故掇其法之緒餘為之記俾嗣者有所徵焉

樂閑堂記

人物之生於世安於其素而不知其樂者眾矣魚在水獸在山不知其樂也處之澗輟繫之虞人而後知江湖山林之樂焉釋而從之俾復其故則其為樂始真知矣物皆然人為甚賤而服賈陸有

摧車水有覆舟虎狼盜賊風濤蛟龍之險卒然遇之號呼丐命於
須臾而後知平地之樂也而仕者又甚焉仕而達矣若可樂也而
其憂苦方叢乎其前事有必爭而不容已者不爭則獲罪君子貽
誚後世爭則彼方震以雷霆壓以山岳惑以簧鼓大廷列坐十九
濶倒而欲以抔土障之當是時也思得釋去重負歸為閑人則其
樂為何如此憂也有苦焉造謁之疲精神送迎之勞筋力晨興趨
府干請出來折簡函文手未及展繼者沓至至擁馬不得前暮歸
復爾寒暑不間休暇匿避若逋逃堅閉若自錮一接賓迹遂終日
不得食思得脫巾履偃仰床第又如蓬萊之不可到也上則不能
過矢去川決之政下則不能厭蠅集豕貪之求憂苦雖極謗議蜂
起矣夫人未嘗不知閑之為樂而真知者寡余蓋身履其境急遽
疲極而後獲閑其為真知猶坐中談虎而常被齧者也鄉人孫友

賢受益居安陽銅冶治卓宛之業而以清慎聞於人集賢院降劄
褒之曰樂閑冲素處士集賢握玉章司天下道教凡名隱者率號
處士又華以冠之受益因以樂閑顏其堂乞言於余受益不游不
試不險於途不困於責安於其素而能知其樂者乎其知不知予
不能知而集賢標榜之其知其能知其樂也若是則華而不浮矣
雖然受益又當讀涪翁之文知收其餘力而就閑之說則可以永
此樂矣

陝西行中書省題名記

至正丙戌冬陝西行中書省平章政事朶朶公合其寮寮移書有
壬曰吾省據要重以控西北南三陲者八十五年矣昔保釐長貳
若廉希憲商挺賽典赤輩皆蔚為名臣而無託以徵及今亟求已
不可得乃斷自後至元元年得若干員刻之石識往行勗後繼敢

以屬子有壬惟陝西當天下一面名雖數更地之雄劇則古今不異也我元天造立宣撫司以養以治中統三年始立陝西四川行中書省至元二十三年朝議分省四川咨答轉滯改陝西行省而四川自為省矣中更王相府宣慰司者一尚書省者二尋復其舊此其大較也世皇宏規遠模立中書省總於中分省釐於外行省遵成憲以治所屬決大獄質疑事皆中書報可而後行則為行省若甚易者然地之所直有險易則任之所寄有重輕矣秦地形勝之雄建瓴東夏分鎮夾輔宗子維成臣工旬宣實任其重中統初廉希憲為宣撫商挺副之同寅行省事治難為易繼以賽典赤之賢山川之險適足以固吾之國故地之險夷視人愚哲朝廷慎簡宜何如哉則是保釐長貳之善可為法惡可為戒者皆不容泯此所以有待於題名俾後世得以指議也國家百年來法令明備遵之者福戾之者罰若殛隨所戾而至孰敢不畏然人情有玩於法狃於習而不知畏者於是法有所不行矣而其本然之善則未嘗泯可觸之機則未嘗息題名一刻俾一見之頃知某之為善使人歌慕若是我獨不能效之耶某之為惡使人嗤唾若是我獨不能戒之耶用是為政豈特為法之一助而弭惡遷善蓋有出於法之外者焉尚論古之人由周而來著績斯土者軌躅相接迭聽風聲皆吾師也若夫德於人而未忘迹於事而未熄率爾踵武其文正王乎平章暨諸公竭誠踵武罔俾專美矣斯石之刻又與人為善於無窮焉後之來者知其名之必列於斯也可不畏乎虛其石以待之

弘齋記

人生天地間以藐焉一身參而三之亦有道乎窮雖獨善若進德

居業之富討論資攬之備大而民彝物則小而酌酢日用莫不總括其理而集於其身及達而兼善也堯舜其君三代其民圉一世於太和以至鳥獸草木亦各使之遂其生育之道天下事物紛錯至沓莫不有以容之容之者何弘之謂也弘也者隘之反也此得彼遺即隘矣雖莫不有以容之亦莫不有以別之也夫子曰人能弘道言人有知思可以大其所有之理也子張曰執德不弘言有所得守之太狹則輕喜易足有一善自以為天下莫己若矣道而曰弘我之力也德而曰弘我之量也聖人示人用力之方才高意廣失於辟者亦有以充其量也承旨開府公器宇汪汪若干頃波扁齋曰弘日與儒士講學其中蚤襲宿衛歷奉常太禧宣徽翰林宗正宥密皆有聲所以大其理守其得者已至矣噫士大夫讀書非不博也才氣非不贍也而其成就卒於無稱何哉患不弘耳聖人大管仲之功而小其器者豈不以其不知聖賢大學之道故局量褊淺規模卑狹功烈如彼而已乎公於是理講明已熟用力已至然任重道遠又有毅馬曾子曰任不可以不弘毅於是而求所以為弘者則内外交修本末兼盡他日見諸事業綽綽有餘裕恢恢有餘地矣公命為記輯先儒緒論而為之書

記八

御史臺照磨題名記

世皇立御史臺肅天憲以正百辟上官底僚罔不各極其選或損或益適於當而已厥初無照磨官至元壬辰臺臣以職入影出納無適爰始奏設又慮員之冗也乃以其職冠承發管勾兼獄丞之上遂為定制焉迄今五十七年階是騰為達官者不知幾人而湮沒無聞者亦復不少今照磨蕭栗刻其姓名於石徵記於愚愚惟照磨兼承發獄丞一人而三職也獨稱照磨者舉其槩也金穀則欲燭管磨研厲其隱失也簿書則欲久近有稽出入無格也圖罔則欲大而無抑無狹小而無淹也三職克盡善茂加焉一或不舉事因有墮矣况三悉不舉者乎抱關擊柝雖賤必敬况列為憲屬

多冠乘驄實權輿於是者乎彼有居其位食其祿卑小官以為不足為高談計月取償華貫不待後之指議憲條森嚴有議於今者已蕭君起家胄監已出官辟為臺郎除是職其言曰前乎栗題名者善不善皆栗師也後乎栗題名者栗不敢知而竊有望焉愚嘉其三職之能舉而其言復有取也故為之書

緱山書院記

古王宮至閭巷莫不有學學其學者非有異事也明天常盡人道而已若庠若序約義異稱教則均爾姬輶之東寢不古若以鄭僑當國且有欲毀鄉校者而况重之以秦火雜之以異端斯文不喪天實相之學校開設日興月嗣若夫書院之號則昉於李唐之麗正郎邑未有也趙宋即老師宿儒講學之地賜額洎書若白鹿嵩陽應天嶽麓遂為永額焉紫陽朱夫子守南康拳拳於白鹿夫豈

不知所先務哉我元戡定伊始即崇文教南北既一黌舍遂徧區宇漸濡百年而書院之闢視前代倍百矣贈翰林學士資德大夫上護軍魏郡杜文獻公瑛字文玉其先霸州人金季避地緱氏山中授徒汾晉間學者即舊隱稱為緱山先生中書粘合珪聘至相因家焉世祖狗鄂至相嘗召先生問計對以三事稱旨且勸上數事後皆如其言及即位徵之聞王文統當國不起授懷孟彰德大名等路提舉學校官又不起其導中書也則以緩刑薄征廣學納士為先其移書執政也則以邈流求源極百千年之禍為務所存不亦遠乎於書無不讀讀無不記記無不究其趣者著述有春秋地理源委十卷語孟旁通八卷皇極引用八卷皇極疑事四卷極學十卷律呂律歷禮樂雜志三十卷文集十卷大約明注義之未瑩補先儒之未足時出己見以祛後學之疑中書嘗予良田

千畝不受知屋下有藏金不發是雖若小不義而千駟萬鍾其屑乎卒五十七年有贈賜之命又十三年河南部使者請建書院廷議避之以維山為額實至正辛巳五月也守臣以官所度地湫隘不稱謀於其孫封彰德路總管愚相攸坤維得故王氏萬卷堂堂故崇且廣子孫發撤殆盡相與哀金易之修大成殿殿後為先生祠東西齋仍其舊又七年令郡守朱彥亨與其曾孫中書省左司郎中秉彝作講堂以居師生新戟門以嚴中外始幾於完矣彥亨合其僚移書有壬曰文獻子鄉先生也麗牲之石宜有刻文舍子其誰有壬孩提知先生義不敢讓且讀山長馬君熙所為狀犁然有當於心者馬君謂先生著述雖有先儒之已發而其自得蓋十九馬槩舉其要以為的然見道之言其知言哉先生出處大節屹然山立視榮達為何如身後祠像之有無不校也然士為學必使

後世從祀孔庭而後為至下是亦尸而祝之非以為榮而以見其為學之至耳以淑鄉里興後人焉有壬生晚不獲親炙而幸託名先生之碑可不因有以語吾鄉之士乎夫學其學者皆人之所當為為子必孝為臣必忠如手之必持足之必履宜無待於上之風厲也天降下民作之君作之師上之人有不容已者焉方今勉勵長育明詔諄復居之有地誨之有師而吾鄉先生貽範有書讀其書而求其心瞻其容而踐其行成德達材由是輩出則書院之設為不虛矣有壬敢便便若是者誠欲明先生之道以淑鄉里也惟吾士其勉之

總春亭記

饒樂平朱彬可取考亭夫子詩額池亭曰總春其鄉人宣政掌故黃君仲綱諗記於余余以未識彬可辭仲綱亟言之知彬可可人

釋辭其可朱氏之先世居新安後徙樂平之清原秀嶺高林流泉沃壤彬可堂構其間鑿二池亭其上不質不華可琴可書可命尊壘以樂友生水陸草木效奇獻秀自形自色自華自實寒暑有代謝而品類更相發榮無過而非春池之蓮窗之草前川之花柳無適而非道也亭號曰總春其誰曰不宜雖然華於春者不若夏秋冬之多而悉歸之春何哉華於三時而生意實自春始歸之春原其始也余嘗達觀乎萬物妙觀乎一原維天之命於穆不已萬殊之所以一本也乾道變化各正性命一本之所以萬殊也學者究其用而未究其體悟其貫而未悟其一故於水陸草木但知其為萬紫千紅而不知其無適而非春蓋自老安少懷之言絕浴沂詠歸之迹熄尋芳日勝豈無他人求其領無邊之境識東風之面舍考亭夫子其誰哉嗟夫盈天地之間皆物也而有所謂植物者焉肖形雖異資氣則同因植物之同而知萬物之同總春之義大矣哉彬可為考亭疏族常來京師從縉紳先生游其亦有聞於此否乎予不得而知也他日仲綱登總春之亭歌考亭之詩然後以余言問之

景韓堂記

相為河北重郡牧守著稱世難於聞周秦邈矣後蓋可考焉若漢京房黃香唐宋景房瑄數百年間指不易屈趙宋羅彥魁而下尤炳炳者其魏國忠獻韓公乎公前持武康之節知相後兩以淮南之節司徒兼侍中判郡蓋古之牧守與宰相同故黃霸潁川治最即入為相而魏公以兩朝顧命定策元勳三守茲郡其重可知已夫以千里之治移之天下舉而措之爾而宅百揆憂患之域一旦釋重負歛惠一方則又朝廷用人弛張之道焉流習輕外訾為徒

勞膠榮朝著不肯一出國門雖自冗員擢為方面皆為下遷倪若水見班景倩入為大理謂之登仙流習之鑿乃至是耶我元重近民之仕作法辟舉屢議屢更必欲真得其人與之共治然卒未聞卓爾在天下者豈風厲振作之道有所未盡耶 皇上勵精圖治一新其法內外通融凡久在朝著者覈其才考其資俾典郡邑河南行省理問太原朱侯彥亨擢彰德路總管以其敷歷中外靡不著稱首膺是選也侯以剛明之資一旦蒞政百廢俱興剔蠹抹荒令行禁止由是名達九重駟賜金段歷徵往躅不一二聞而達魯花赤沙刺甫丁臧吉判官馬德涪推官姜彬同寅協恭知事王大本照磨李弘道畫諾平九郡以無事於是葺公署之後堂扁曰景韓蓋景行先哲慕魏公為法徵記以訓詩不云乎高山仰止景行行止說者謂景行大道也言高山則可仰景行則可行若魏公

者非高山景行乎凡天下牧守皆當儀刑於百世下况踵其武踐其位者乎槩其三至合四十餘月利澤之及人如決渠浚隍柵柳廩粟闢牙城除戎器奏罷盜鉄以紓民力乞國監書以基風化皆宏遠之規非為目前苟且計者至於秉鈞調元天下均受其賜豐功偉績史有不勝書者已然愚竊疑先儒稱其務容小人豈含糊求合於人乎蓋君子必欲充其量而後可以有所容可以有所容而後可以施諸人可以施諸人而吾之事業成矣雖大而弼亮三世救宥四方獨運廟堂再安社稷亦由是而推之爾且魏公作郡作相無一不可為法而愚獨稱其量者誠欲諸公法魏公必造其極而一政一令之及閭閻者在其中矣所謂牧守與宰相等者其尚有資於是焉後之守倅觀是扁也其亦致力於實踐哉塾中慕郭解憤傲王則前政專美矣是為記

承恩堂記

皇上御天之十六年勅中書慎簡守令或陞辭親勉或中書喻旨皆賜宴教遣曠典異數所以必其稱而期於治也安陽吳密椽臺出官佐奉使宣撫竣事擢尹渤海將行請言有壬時待罪中臺嘗序以餞既而朝廷遣使覈治忽之迹而渤海之政在治列復最他治中書以聞有金段之賜密因扁其解之堂曰承恩有壬既為大書而渤海之民李信義李玠蕭克敏劉誠復諉儒者王憲俾請於有壬曰吾明府吳君德我非一思永其傳而刻銘庾法侯為去思則吾民不忍言其去也承恩有堂苟因記之不惟彰君之賜而吾明府之善因附以傳顧不兩得乎又東平韓學詩撰德政詩百首首括一事皆炳炳在人者軼王允規十奇而過之遠矣有壬昔之序有曰余雖不與考績尚能為子紀其實密也在邑不二年治效

有成紀實踐言記其可辭語曰君使臣以禮臣事君以忠有壬於是見有以見為治之機焉各欲自盡而已昔有賜緋衣或百縑或衣一襲非私也亦盡使臣之禮爾厥後但聞有罰使以禮未聞也治不古若有以哉皇上徵往古發言宸衷海濱遠邑至遣使賜賚盡使臣之禮矣昔人在畎畝不忘君而一飯之恩必報况恩隆山嶽以忠報稱宜何如哉不名之堂不足以祿其恩報之誠不於家而於公署又以垂勸於後來而臨民聽訟之際顧瞻堂扁凜乎其陟降左右也敢易其心乎且今能盡其職德於民名其堂懋於報而其民又能不忘令德以示於永久一邑之治可知已推之天下有不治乎而天下之大一時承恩者幾人名堂思報者有幾而恩之未逮者先儒嘗謂不患使不以禮患忠之不足盡亦自盡其道乎密也植志不回爵祿汨汨異時畫錦歸故鄉其權輿於是接踵而

登斯堂者尚有望焉

公生明堂記

彰德屬州曰林俗淳訟寂號易治且山水可適高堂孫君徹徹爲
由中書直省舍人來倅是州上官與其能小民安其政山水之適
則未遲也州治西北有公明亭圯廢已久金承安間宋徽記文石
刻故在一日孫君洎其守若僚請曰亭故遊息地今不能復其扁
則可取然不若用其全局之該也丐書公生明三字揭之州堂日
視以為傲予喜為之書既又請抒其義以發其藹請亟而切乃為
之說曰公之為義大矣哉天無私覆地無私載日月無私照黃帝
之治天下語其輔佐亦曰公而不阿而已周官曰以公滅私民其
允懷說者謂以天下之公理滅一己之私情則令行而民莫不敬
信懷服矣則是公之為用通三才而一之至天子以至於普夫板

尹不可須臾離者也人稟天地之中以生具眾理應萬事者心也
虛靈洞澈無物不燭一蔽於私蒙昧昏錯而其本然全體固自若
也荀卿於是立公生明之說其啟人至矣蓋公也者無私之謂也
無私則淨淨則明明則如鑑照物妍媸黑白舉無遁形明也者公
之發見者也而所謂生者謂有此公即有此明猶播種於地而必
出焉以之扁堂觸目傲省而又克己復禮以立其體應事接物以
適其用不微名以為公不任數以為明一毫私欲無自而入理之
微地之遠莫不瞭然在吾目中尚何覆贖之有哉若夫不下比以
闇上不上同以疾下分爭於中不以私害之荀卿所謂公生明者
諸君得之矣推公生明之極致尊君愛民物至而應事起而辨將
不進為通士乎諸君其勉之

河南省檢校官持平堂記

河南省南控江淮西倚崑函東掖海岱以輔承京師中土大方面也地重事劇鈐槩膠轄酌酢釜盂雖有敏者不能必其無戾焉隨事釐正不遠而復此檢校官所由設也夫以七品之職釐一品大府之遂事其任亦重矣哉而弱者俯仰詭隨愆繆何望强者取嫉於上陽示委注陰實遠之終歲跋跋不安其席於是官以之曠而事以之隳矣至正戊子春中書知管差除掾濟寧羅吉擢任是官冬石司掾河間王國瑞繼至協恭交修翕然著稱剏治就緒得以展布餘力顧瞻公署歲久將厯請諸上官出公帑葺之甫逾月煥然改觀扁曰持平余既為大書尋復請記夫天下之至平者惟水與衡而已大而江河小而溝池其平中準大匠取法焉石或磯之則不平矣重而千鈞輕而錙銖應之以權無不平者手或撓之則不平矣今夫疆域之大事物之夥金穀也銓總也工作也傳置也湮而欲發也泛而欲防也柅而欲行也躋而欲正也不磯不撓則能適於平而不磯不撓其亦有道乎荀子曰士大夫以上至於公侯莫不以仁厚知能居官職夫是之謂至平惟其本之以仁厚行之以知能施於有政無所往而不得其至矣韓子曰物不得其平則鳴檢校不任他事專職於此一失其平不惟瘵厥官鳴者紛起矣而况大官臨之史屬睨之可不慎哉執玉捧盈持而勿失階是而理機務天下且平况一省乎二君勗之且以告後來者

魯齋書院記

至正乙酉江西湖東道肅政廉訪使李守仁言魏國文正公魯齋許先生為我元儒宗祀祀孔子廟庭而覃懷先生之鄉大德間鄉人王紀作祠廟學西偏庠隘弗稱昔濂溪為南昌丞宗濂坂設况道州其鄉乎覃懷猶道州也故中書聽永額為書院校職屢更

祠則仍舊歲久且壓守臣嘗請郡巽隅地構築未報宜亟作以副
書院名是牘上報可之符始下先生孫今河北河南道肅政廉訪
使從宣入其宅地爽塏夷曠過請地判官馮祺經始石國英代之
同知李守敬輩一乃心力市材厄徒成祠而奉遷焉前為兩序後
為講堂東西有齋岐以重門繚以周垣西偏作屋以居校職神居
有嚴講授有地書院之名實副矣倂來屬記有壬昔長中書左司
陪先生子右轄公師敬時聞過庭餘論且讀遺書亦私淑者也義
不敢辭夫道統在天地間由開闢迄今日未嘗一日斷絕明晦有
時爾接而明之其人乎孟子謂五百年必有王者興其間必有名
世者亦舉其槩爾孟子後千四百年始得二程夫子天佑我元
俾道統之傳亟有所屬朱子卒才八年而先生生際興王之昌運
得正學之真傳接道統以淑來世任斯道以覺斯民非天意有屬

而能然乎舉而措之事業若時務五事其槩也嗚呼中統至元之
盛有隆古之所不及而有志之士竊有感焉者何哉孟子距楊墨
韓子謂功不在禹下程子興起斯文其要在辨異端闢邪說先生
之立朝也當良始萬物之際正始以理萬物端本以暢百支則其
時也乃有申韓邪說雜鶩於中其言甘而易入其功卑而易著舉
世張儀以為開物成務如斯而已當時辭而辟之者其有所自也
卒之正言以驗正道以明使踵之者知其不容於正途懲塞其將
來蓋攘斥之功出於平居講明聖學辨別邪正之有素也其有功
於世大矣世徒知道統之有在而不知所以羽翼夫道統者又有
在焉至大庚戌集賢大學士姚公燧作祠堂記猶以未升從祀天
靳築室為言皇慶癸丑始從西臺侍御史趙世延請暨宋九儒升
從祀建書院京兆記則翰林學士承旨程公鉅夫筆也元統乙亥

皇上勅翰林學士歐陽玄為神道碑與夫制誥贊誅記銘推明道統之所在者至矣有壬晚學謏聞無所容喙矣竊惟先生之道在人心夫何遠邇之有聞天下從祀感觸之機大矣哉懷之人固囿其中而猶屑屑鄉里者豈不以鄉里視天下其感觸之機又有捷於桴鼓者焉王烈居鄉爭田者望廬而返陽城居晉鄙董其德而善良者幾千人况道德度越二人者乎懷之士過先生之祠有不惕然而興者乎昔先生之教育懷孟也制辭有曰再令董子惟前有傳受之弟子王通門下皆經濟之名臣有壬於懷之士有望焉

碑志一

上都孔子廟碑

至元二年丙子歲七月庚午 皇帝御洪禧殿太師秦王中書

右丞相答剌罕臣伯彥率中書臣僚奏上都 世祖皇帝所城

至元間作孔子廟 仁宗皇帝修其敝增兩廡庖館故事當刻

石紀 列聖崇文重道之實以詔後世石已具擬中書參知

政事臣有壬為文奎章閣侍書學士臣巒巒為書奎章閣承制學

士師簡篆其額留守臣董其樹立制可臣有壬被詔悚慄罔知攸

措洪惟 聖朝肇造區宇亭毒運用之大功並開闢而孔子之道

猶天地日月人無能名若臣之愚其何以鋪張天休闡揚至德若

夫列聖崇文重道之實徵諸聞見或可復明詔萬一謹拜手稽首

昧死而言曰昔我

太祖皇帝之應天啟運也干戈中徵耶

律楚材置左右備諮訪聞周孔教深用嘉納知天下不可馬上治立十路課稅使副皆用儒者國朝尊孔道用文臣實自是啟之

太宗嗣位修曲阜廟孔子五十一代孫元措仍襲封衍聖公置

編修所於燕經濟所於揚以開儒治鞏曲阜雅樂俎豆祭服至日

月山王鶚以孔子像達北庭命秋丁行釋奠禮飲福均昨歲以為

常收羅儒士俾轉教授遺斷事官木忽解山西東路課稅長官劉

中徧試儒人中者與收守議俾蠲其役且將闢舉場以精入仕擇

必闈赤子十八人學漢語文字漢官子參學國語弓矢擇師分四

隊以教命中書令楊准中主其事作屋居之餼廩育之夏楚督之

迄定宗朝不輟 憲宗悉除漢地河西儒戶徭役 世祖在

藩邸招納儒士撫謙問答知草澤一士賢飛書走幣猶恐失之燕

廟學泊於道流奪而歸之儒增修敝陋聞實默三綱五常之言聖

見超詣即謂人道無大於此失此則不名為人且無以立於世及

正大位詔先聖廟國家致祭宜恒修潔官若使若軍馬母泊其中

理訟褻晏營造者有罪內設國子監學外分提舉教授以職教議

行貢舉法以取士督有司以主嶺責按察以勉勵儒籍者復之材

成者擢之分田制祿以奉祭祀以資營修以祿其師以廩其徒而

學政備舉矣 成宗首詔敦勸且議貢舉又特詔中外百司申

世祖之制其畧曰孔子之道垂憲萬世有國家者所當崇奉

而曲阜上都大都又專言之聖意所注可見矣 武宗 仁

宗 英宗 文宗恪守祖訓凡大播告必首及此而 武 宗

宗加號大成遣使闕里祀以太牢示萬世無上之絕尊 仁宗

行賓興法先德行尊五經繼志述事有加焉 今上皇帝三降

德音靡不懇切此徵諸聞見班班有據者也尚論歷代之典禮樂
制度莫不相因而我朝截然首出為一王法立網陳紀大括宇宙
細盡事物不資載籍動合孔子之道非天啟大聖為斯文主以康
濟斯世而能然耶而天造草昧一元埶比之始戡定雖武文之用
實行其中猶秋之有春藥之有食所遇之時異所施之偏有不免
爾天常人紀自然之理則無時無地而不在焉 世祖既城開
平尋升上都文治益修至元六年命留守臣顏蒙古反作孔子廟
都城東南 仁宗皇慶二年命留守臣賀勝重葺舊殿增廊廡
齋廳庾廩庖湑開闔垣墉西偏為堂廡以待國子分學田坐雲州者
六十頃五十九畝興州又十四頃以教以養作人之盛蔚乎首善
之地矣 今上當立大臣協贊益闡大猷使萬世之遠億兆之
眾皆知孔道之可尊而祖宗功烈百萬可述獨及此者誠以斯道

在天地間一日不可無一日而無猶天運之或息無以為天地矣
而貽謀垂憲舍是無大後世尊而行之其於治天下成規大法特
舉而措之爾臣聞道之大原出於天其顯者謂之文帝德廣運之
文經緯天地之謂也天之未喪斯文禮樂制度之謂也刪詩定書
係周易作春秋孔子之文也彼深文小道急近利誅未效漸漬馴
致貽禍國家雖以王文統之才卒負任使 世祖明斷罪人斯
得况下是萬萬者乎均謂之文可不知所辨哉士之藏修於是學
者其慎擇從自格物至於平天下皆斯道也繼自今萬億年開太
平之基以上副 列聖崇文重道建學作人之意顧不偉與
臣有壬謹拜首稽首而獻頌曰

聖神立極順天應人謀始斯臧繼體惟寅道有大原顯者為文爰
出萬化茲其大鈞金革土沸弦歌載詢考禮綿莖徵賢蒲輪灑水

之陽龍岡作都據其上游建瓴中區乃啓守成大本在儒國都閭
巷有師有徒茲惟首善盡示遠圖咫尺象魏作宮渠渠南面圭袞
北庭詩書 列聖繼明顯承弗替既極其稱復新其敬居以
饗廩蒐以科第百年長育四海漸被教隆化洽人有士風引而伸
之萬世攸同 皇帝曰俞汝臣有壬紀載釋辭後因有今拜首
稽首 天子萬年斯文斯道如日在天地位焉萬物育焉拜
手稽首 天子萬年

大都三皇廟碑

三皇置一廟有司以時祭享昉天寶六載我 元稽古崇德報功
元貞初天下咸秩京師歲春秋御祝香祠以太牢宣徽供膳饌太
府出銀幣大興府給事而太醫院主之三獻奏名蒞事禮崇物備
非唐可擬顧惟殿宇涉久傾圯院使伴哥諷咨同官合辭上請勅

工部重葺寢廡齋室應門繚垣以及城坪炳煥俱新而碑未有紀
至元三年歲丁丑十月壬午偕院使哈刺解五十四經歷卜顏帖
木兒請於太師秦王答刺罕右丞相伯顏協議敷奏制可中書參
知政事臣有壬製文奎章閣大學士臣夔夔侍書學士臣師簡為
書若篆中書移臣有壬臣有壬不敢辭洪惟三皇繼天立極生民
以來君德最神聖者也十三卦言其功不及其德合元象春言其
德不名其功德無能名功無所歸一有形喻蠡海而管天矣醫家
者流果得而專乎徵諸掌故大德間陝西行御史臺議名醫配祭
定制禮官議開天建極者列以十八則專為醫其可禮部避之至
大間湖廣省請名醫配享坐次禮部議視大儒從祀列置兩廡豈
一時不考大德之議而許之耶豈以素問稱黃帝本草稱神農而
享包始庖義耶而天下遂為定制矣昔在壬辰 太宗皇帝慮

人有札瘥夭死也羅天下醫置太醫大使佩金符辛丑立太醫院
總其政 憲宗皇帝癸丑冠以提點 世祖皇帝中統庚申
給銀章又別置太醫院丙子合二為一戊寅冠以禮部尚書癸未
改尚醫監秩正四品乙酉復太醫院秩正三品 成宗皇帝大
德辛丑升正二品惟幄重臣領之其貴且重視同醫師秦漢而下
太醫令丞不侔矣補太醫員慮不根學試嚴科條入官階升迄長
其院尚方侍湯掖諸王重臣請醫奏遣之郡邑設學置教授正錄
教諭員教其術業又置提舉司其戶調自為銓衡吏部不得而可
否也閭閻細民征戍病卒惠之有局待之有堂著於格令以廣好
生之德者厥惟至哉生民林林夫婦父子君臣上下之分定飽食
暖衣養生送死之具備禮以維之刑以弼之萬世永賴可必也而
曰時陰陽之沴感之為疾有夭死者已則不能必其無也於是為

方技以待之在三皇功德雖猶海之一勺天之昭昭然亦與於生
民之大者與天下祠事俾醫尸之其以是也夫用是諗於其官若
學者曰學治國具也古一而我三焉國書一代同文之制儒以明
人倫醫乃鼎足峙者以其為業重且難故也技而進於道者也故
必參造化之機窮事物之理而又存之以仁濟之以廉者其庶幾
乎內經尚已近可訓者亦知孫思邈之論習業乎妙解百家探蹟具
學醫始無滯周醫師歲終稽其全失民有始終疾醫各書其所以
入於醫師若是其嚴也其或懵經旨而冥行席世名而無實熟一
方而自售偶一效以自信斃人不刃者雖有常刑而逝者不可復
矣盍思 列聖崇秩建學之意而慎之哉且醫之責在師師
之責在總於上者擇之精布之天下則人之鮮於藥者免矣伴哥
又以銅人圖經字漫屋摧徵考無從得請修治其具以待其人

其知長人之責者乎京師天下原抵大官蒞之故將達於流而暢於枝藹乎生民之遂其生也不然三皇天地其居也元氣其神也何有於一室之修廢耶我元紹天闡繹尚質素以基皇德其亦皇首之初乎皇帝擴列列聖好生之德開壽域續民命至和淪浹踵而齊泰矣於以昌聖躬萬億年無疆之壽於以固萬億世不拔之基於戲盛哉臣拜手稽首敢對揚天子之休命

勅賜經筵題名碑

世皇經營六合崎嶇金革間首索金餘黎獻及一時經術之士諏諮善道及正九五益崇文治至元三年十二月遣中都海涯諭旨儒臣朕宜聽何書其議選來進於是商挺姚樞楊果竇默王鶚言帝王之道為後世大法皆具尚書乃以進講八年許衡安藏進知

人用人德業盛天下歸之說深用嘉納仁宗御極臺臣請開經筵乃命平章政事李孟時入講誦泰定間始以省臺翰林通儒之臣知經筵事而設其屬焉今上皇帝法聖祖之宏規考近制而損益之開宣文閣選中書樞密御史臺翰林國史之臣以見職知兼經筵丞相獨署以領重其事也其下有兼經筵官參贊官譯文官率以中書翰林僚幕若閣屬為之而不常其員又其下譯史三人檢討四人書寫五人宣使四人有公移翰林國史知經筵者署之仍用國史院印章奏為著令至正七年正月二十日知經筵事翰林學士承旨篤憐帖木兒暨領經筵事中書右丞相別兒怯不花奏經筵啟沃聖心裨益治道甚盛事也領知若兼之臣宜立石以記其姓名擬翰林學士承旨臣有壬為記御史中丞臣朶爾直班為書知樞密院事臣太平篆其額制可臣有壬竊聞聖人之道

為天地立心為生民立極為萬世開太平之基斯道之明其本於學乎賈誼謂人君不可以不學故雖聖人亦資於教五帝三王皆有師而求多聞學古訓遜志時敏念終始典于學不獨殷高宗為然古今帝王之至訓也漢之賢君祖德師經承師問道致治之盛其有以哉若天祿石渠白虎華光與夫唐之弘文集賢名雖不同其討論墳典圖維治平皆經筵也我世皇徵用儒雅開萬世太平之基薄漢唐而不居一本聖人之道垂裕後昆皇上以天縱之聖留心經籍緝熙聖學治效之隆視中統至元無忝矣臣有壬承之經筵前後且十有五年每番直進說天顏怡悅首肯再四經旨淵奧有契宸衷聖德日新宗社億萬年無疆之休此權輿也講文附經為辭若古疏義而敷繹之繼以國語譯本覆誦於後終講合二本上之萬機之暇以資披閱焉夫官署題名昉自近代百司且有之况國家崇儒重道講求太平之大者乎凡與是選莫不以為榮遇而列其姓名者不特榮遇而已抑將勵其傾竭忠誠以格天心勿使後之觀者指而議曰某但榮遇耳則斯石也不為觀美文具矣

勅賜大司農司碑

語不云乎百工居肆以成其事有其地則有以庀其司鳩其人則有以儆其功苟判渙無統遷於異物求業之精不可得也百工且耳况崇位重秩而亮天工者乎大司農總天下農政其崇且重視古有加焉釐務之司宜雄大華遠而因循卑陋不稱位秩時雍坊故相伯顏之居實甲諸第堂皇突兀宛若公廨重階連棟櫺比鱗集傍可僚幕列可曹局帑庾固密可以儲金幣棲簿書槩以官府所宜有者無一不具既歸之官雖力可請賜而土木勝人不敢居

也。就之齊民收其租入，則虞烏合雜揉日就廢壞，獨有闡為公解是稱是宜。乃至正六年閏十月二十五日，大司農納哈木桑哥失里大卿海答兒圖刺帖木兒少卿密邁蘇麼司丞拜住王恪經歷曲出帖木兒都事脫因奏：凡地舍邸肆沒入者悉歸農司伯顏之居在其中，議諸中書農司宜用為解制。允其請，遂遷而闡治焉。明年二月二十一日，大司農柔哥失里吳秉道大卿海答兒圖刺帖木兒少卿密邁蘇麼司丞拜住經歷曲出帖木兒都事脫因覆奏解既得，請宜紀其故。勅翰林學士承旨臣有壬文諸石洪維聖天子敦農務本，責成其官，因隆其居，紀天休播後世宜也。然古人緩於頌而急於規，故槃席几杖觴豆弓矛莫不有銘以示戒也。一器之微為戒，若是則堂高數仞，椽題數尺，可不因其地以勗其思，居其肆以成其事哉！帝王之治厚生而已。唐虞大聖首重命稷

箕疇八政，周詩生民七月皆王道之始也。世祖皇帝稽古建官，特立農司，雖品秩之隆殺分釐之內外，時有不同，其所以敦本抑末責成實效則無以異也。仁宗皇帝陞其秩從一品，位之崇也。其望益隆，秩之重也。其任益大，況一新其解，百工有肆矣。亦究其事之成與不成乎？且農司之立七十七年，其設置責任之意播種植養之法，綱以總於內，目以布於外者，燦然畢陳，密而無隙矣。責之也嚴，行之也久，其效宜何如哉！今天下之民果盡殷富乎？郡邑果盡其職乎？風紀果盡其察乎？見之簿書者果盡如其說乎？政猶解也，嗣而居者亦思所以責其實，保其完舉，其仆苴其漏乎？方今農司之政，其槩有三：耕籍田以供宗廟之粢，盛治膳羞以佐尚方之鼎釜，教種植以厚天下之民生，尊卑之勢不同，理則一爾。卑或凋劫，尊孰與奉厚之之道，其農政之先務乎？昔韓愈氏取巧

者王承福之言操履入富貴之家有一至再至而為墟者以其屋之歸於官也其要則曰食焉而忘其事必有天殃臣於是重有感焉昔過其門莫敢仰視一旦為我所有而治事其中念彼之失我之得也敬畏之心惕然而生矣則是辭也非我龜鏡乎持是敬畏以治其事則事無不成也於農政也何有

至正集卷第四十四終

至正集卷第四十五

碑志二

勅賜重修陝西諸道行御史臺碑

至正丁亥十一月庚戌日南至 皇帝燕延春閣御史大夫臣納麟等奏陝西行御史臺歲久屋弊既撤而新擬御史中丞臣有壬文其故於石制可臣有壬承詔謹按其狀而筆其槩曰臺治位今奉元城之良隅且五十年罅不即瑱撓不即易馴玩將不可支歲辛巳都事樊執敬言行臺據雄鎮具瞻重威廢乃若此今不亟修後費滋甚乃移文中臺再閱歲始報可於是市材秦隴得木山積瓦甍百萬靡不具集而尋引斧斤稽而不用乙酉冬十月中丞韓嘉訥蒞止按視儲木暴露而衰朽已過半慨然率作俄復召入累遷為御史中丞奉元無良梓人巧者以告中臺中丞為請諸尚

至正集卷第四十五

碑志二

五十一

方擇精其藝者乘傳而往侍御史沙班李好文都事朱守諒輩得以儔其功焉丙戌五月庀工六月中丞篤思彌實治書侍御史老老至九月正堂暨幕署告成且輟且作中丞趙得壽侍御史慶善維之明年四月韓嘉訥復來為御史大夫八月侍御史沙刺班至後先協恭迺遷就緒入冬而落馬堂扁至公仍其故也袤深五尋有二尺廣九尋挾以翼舍麗以兩厦貫以修廊屬以圓堂東西曹局各二十六間過廳前峙照磨所附其西位置秩秩察院若掌故帑藏不易舊貫佻悉一新庖傳廐樞各底堅好堂北伐土泉湧因浚為池益以龍首渠水構亭其上池陰東西各為亭基城東北作屋以備登覽前三其門引映峻邃先是出入委巷狹隘迂折民居直其衝者願輸為道倍值酌之闢為通衢如砥如矢是役臺官總於上僚屬奉於下舉盡恪恭毫釐之廢皆出臺儲以故工不知勞

民不知擾考室度功名雖曰修而實則創矣我世祖皇帝至元戊辰建御史臺以清風俗以正百司而政之布報地之逖邇有不齊焉丙子平宋明年立南行臺總十道以按三省雲南則提刑按察司治之尋升行臺以按邊徼邊徼既寔相地之宜以大德丁酉四月移治京兆是為陝西諸道行御史臺按陝西甘肅四川雲南四省總陝西河西西蜀雲南四道廉訪司而節制於中臺焉關中東控中夏西南北極邊陲樹之行臺俯制部屬崇嚴之勢立則敬畏之心生敬畏之心生茲用不犯矣此其小者爾若夫消姦邪於未萌軋豪猾不敢喘氣使山川失險里巷不驚臺與地亦重矣哉臣有壬考其歲月因有以觀政焉解弊已久始有修葺之議又七年始有成其不至傾圮幾希今也堅足以待歲月密足以范風雨崇足以警部屬為政之道豈外是哉建臺八十年来中外憲條

無一不備玩而不舉亦猶是屋一有振舉煥然截然政未墜也然
臺有恆言謂之風憲亦有說乎風者天地之使也王者之聲教也
故上行下效謂之風憲者法則也周禮懸法示人曰憲法則是風
之與憲二而一而二者也可相有而不可相無者也風主於教
憲主於法上之行下有不能效者則繼之以法未始專主於法也
我正而後責人以正我廉而後責人以廉苟不是求一以枉後惠
文從事待若束濕視若寇讎不亦昧於風之為義乎故必先之以
風而後之以憲二者不使偏廢則吾政之修與廢俱新且於其未
弊而時葺之則廢與吾政其永無弊矣臣有士為是說以答明詔
庶乎古人作器有銘之義也董治察案中更非一皆刻名碑陰以
著其勞焉

勅賜興元閣碑

太祖聖武皇帝之十五年歲在庚辰定都和林 太宗皇帝培
植煦育民物康阜始建宮闕因築梵宇基而未屋 憲宗繼述
歲丙辰作大浮屠覆以傑閣鳩工方殷六龍狩蜀代工使能任督
絡繹力底於成閣五級高三百尺其下四面為屋各七間環列諸
佛具如經旨至大辛亥 仁皇御天聞有弊損遣延慶使搨思
監輦錮葺之又三十二年為至正壬午 皇上念 祖宗根
本之地 二聖築構之艱勅怯憐府同知今武備卿普達失理
暨嶺北行中書省右丞今宣政院使月魯帖木兒專督重修歷四
年方致完美周塔塗金晃朗奪目閣中邊項踵鉅細曲折若城平
髹堊靡不堅麗精至重三其門繚以周垣煥乎一新縣官出中統
楮幣為緡二十六萬五千有奇費視昔半而功則倍之丙戌十一
月七日 上御明仁殿中書省臣奏閣修惟新不可不銘勅翰

林學士承旨臣有壬文諸石臣有壬拜首稽首而言曰天地運用之妙臣無得而名焉即其形迹近者言之風雷雨暘之散動潤烜發生萬物者皆自上而施於下源泉陂澤之流通抒泄灌溉大田者亦由高以及乎卑我國家興王之地俯瞰萬國大聖人首出庶物位乎天德引閩孽萌紐牙開闢而後蓄而未發之氣以資始品彙自上而施於下由高以及乎卑故澤之流若高屋之建瓴師之出如泰山之墜石功烈之成登三邁五漢而下莫我擬也定都和林造邦之基立矣太宗憲宗雖干戈間而以不嗜殺人為心聞象教清淨覺皇慈仁之旨有契宸衷資其說以格蚩蚩之未格者非大示尊崇則無以為感觸之地而大聖人壘空四海撮土八埏囊括宇宙席卷河山之量實兆朕於是焉臣有壬生長熙洽之世湖南名利固不歷觀聞嶺北人詭閣之大竊疑其夸

質諸嘗行陝蜀江廣閩浙且任嶺北之人信天下之閣無與為此也昔祇桓寺基八十頃一百二十院祇陀須達二人成之我國家富有四海視布地之金特錙銖耳則此閣締構之峻偉傑峙與雪山相高鷲嶺倂盛宜也閣始無名但以大閣寺著稱皇上賜名曰興元之閣蓋經始之日實我元順天應人龍興之初名協乎實矣且和林自元昌路為轉運司為宣慰司又為嶺北行中書省丙辰迄今九十一年而列聖峻極之蹟雄都瑰異之觀無一人一言及紀述者一旦形諸玉音刻之堅珉遲速其亦有緣乎於戲休哉為大利益其可量也夫銘曰鴻蒙再闢世再初聖神立極卑黃虞建邦乃握天地樞俯拾萬國如墜枯磬磬赤子飢待舖后奚後我來其蘇天戈豈欲專天誅心以不殺人自孚顧茲象教非虛無與我異世而同符以大智慧明

羣愚開極樂國包寰區祗園方欲鳩其徒乘龍遽爾反鼎湖後聖
繼作志不渝巍巍成此梵率居不宏其規豈遠模蠹天拔地高標
孤中有屹立金浮屠諸佛環擁分四隅至大修廢走使車三十一
年等須臾吾 皇法祖恢聖謨坐令金碧新渠渠厖恩覆嶠均
堪輿如閭容塔綽有餘中書有請帝曰俞汝臣有壬其大書不騫
不磷磐石如億萬斯歲綿皇圖

勅賜推誠宣力定遠佐運功臣太師開府儀同三司上柱國

曹南忠宣王神道碑銘并序

曹南忠宣王薨六十年若乃祖乃父豐功高烈墓道之石咸未有
紀至元六年歲庚辰十二月己亥中書右丞相臣脫脫左丞相臣
帖木爾普華等以聞勅中書叅知政事臣有壬為銘翰林學士承
旨臣爨爨為書翰林學士臣玄蒙其額臣有壬承命兢惕而竊又

自幸

皇帝不以臣庸劣俾忝台司而王之子臣脫歡實平章

政事世講義篤當恣其世家飭其未至以章眎來世矧威命有赫
其敢以弱陋辭王諱阿剌罕蒙古扎剌兒氏祖諱撥徹贈定威佐
運功臣光祿大夫司徒上柱國追封曹南王謚忠定父諱也柳干
贈宣忠靖遠佐運功臣金紫光祿大夫中書右丞相上柱國追封
曹南王謚桓毅祖妣塔拜妣滅列俱追封曹南王夫人忠定幼宿
衛太祖皇帝服弓矢職割烹從征屢有功竟死於戰桓毅嗣宿衛
事岳里吉太子從濶出忽都禿太子伐金遂侵宋以功陞萬戶尋
以天下馬步禁軍都元帥副大將察罕征討察罕沒遂代之統大
軍攻淮東西諸城至廣陵戰沒王嗣職統其軍己未從 世祖
皇帝渡江破宋師隆興北山還上都賜黃金五十兩中統初詔將
所部討阿藍斛兒渾都海追至河西有功二年從征阿里不哥賜

金箴一文繒九三年從宗王合必赤討李壇賊搯老僧口日夜搏戰走之奪其鎰重進拔濟南賜金鞍文錦各一黃金如上都數四年春錫虎符銀章至元四年有事襄陽走宋師安陽灘賜白金衣物五年大軍圍襄樊分戍百丈山以倚宋師戰累捷十年拔襄樊十一年略地郢復奪郢州南門壅視地勢可達戰艦於江遣撒里蠻白大將自沙蕪口入江取鄂州泝江陵復遵陸略地至鎮江十二年擢昭毅大將仍蒙古軍馬軍上萬戶權行中書省事駐建康與右丞相伯顏泰政董文炳為三道水陸分進期集臨安王以右軍取道獨松關破東堪砦至護牙山遇宋師手斬其將杜總管獲甲盾數百人溧陽界復值宋師斬騎將二人禽裨將祝亮等四十二人斬首三千級進拔溧陽獲首虜七千戰章步橋斬其將吳奉使斬首三千級進攻建平破之斬吳許兩總制拔廣德西安長興

攻獨松關禽谷總制至栢市禽其將張八斬首二千級進中奉大夫行中書省叅知政事十三年三軍會臨安宋亡九月徇浙東未下郡邑所至納款降趙提刑等五百餘人追宋宗室秀王與擇於閩至福安轉戰四十餘里殺其步帥觀察使李世達於陣俘與擇及其子弟監軍趙由懌防禦使林德獲印章五器仗萬計安撫使王吉等皆望風降偏師入興化禽宋相陳文龍招降宋官二百餘人淮兵三千人江南平十二月以行中書省叅知政事行江東道宣慰使十四年入覲進資善大夫行中書省左丞仍宣慰使十六年進資德大夫行中書省右丞使如故十八年入覲賜玉帶弓矢進光祿大夫中書左丞相行中書省事統師四十餘萬征日本次明州而薨年四十有九是年十月吉日葬曹州濟陰縣郭村之原初贈協謀佐理功臣太師開府儀同三司上柱國曹國公謚武定

加進推誠宣力定遠佐運功臣太師開府儀同三司上柱國追封曹南王謚忠宣配脫端闊闊倫忽都臺並封曹南王夫人子男二曰也速迭兒襲左手蒙古軍萬戶天歷初有擁護功遂奉預河南省三轉知樞密院出為河南省平章政事兼山東河北蒙古軍大都督入為集賢大學士進銀青榮祿大夫薨曰脫歡起家同知蘄州路四轉為河南左丞由南臺侍御史再遷為西臺御史中丞母疾棄官歷江西湖廣江浙三省平章政事進階光祿大夫拜南臺御史大夫改河南平章以母老辭至元六年拜中書平章政事在政府念母老而遠語及輒流涕南臺總十道按三省非重臣不可復拜御史大夫且使其養也女五人適管軍總管忽刺出貴赤衛副使八合謀蒙古軍千戶塔察而真定路總管哈刺孫蒙古右手萬戶也而吉尼孫男女若干 皇元以仁武取天下艱難肇造與

共事者惟國人爾而國中尤賴以濟者若扎刺兒氏則四傑之一焉王之乃祖乃父無征不從無戰不捷而所部之士威信素著如臂使指無不如志天下既一俾率其部而世其職雜居腹心之地以制四方 世祖皇帝萬世之遠圖也王明而恕謀而有斷始襲其部士皆樂為之用提兵鼓行指期制勝其追叛河西攻堅歷下力戰襄樊略地郢復可謂雄偉之績矣若夫卷甲沙蕪而長江失天塹之險分節獨松而重關若無人之境卒使宋主面縛海隅風靡則無忝爾祖而世篤有加焉日本之役未至而薨厥後蹉跌貽悔識者謂使王在當不至若是也 皇元屈羣策以一區宇舊勞之臣耆艾熾昌者非一王暨祖考皆死戰陣以致寔救乃身不享之昔賢謂世德之臣厚施而不食其報然後其子孫能與守文太平之主共天下之福王壽不滿其德而二子佐列聖重熙之

運皆致位崇極王薨甲子一週矣賜銘墓道哀榮益新又立祠建
康賜祭田千畝世福蓋未艾也嗚呼崇德報功朝典縟矣歸美報
上獨不在王子孫乎臣有壬再拜稽首為之銘曰
於赫天造秉鉞四馳芟夷蕪梗以式九圍河翁嶽喬貴胄接武闕
如奮出奔走禦侮桓毅之子忠定之孫率我舊部勗我鋪敦帝命
南伐潰襄拔郢夷庚既塞我旅爰整嘽嘽匪車舟乃陸通投鞭斷
江率潁而東三軍犄角分趨吳會遂啟溧陽肆我禡類角崩稽首
漿壺食簞廣德弗城獨松弗關大會臨安組頸道左乾清坤夷四
方來賀叢爾島夷乃敢不庭皇風播海長星墜營訐訐郭原鬱鬱
王兆焯勤崇極申以廟貌既歷五紀蓋文其碑亦惟天道遲速有
時假寵九原追功未墜聿聲其休永錫未裔

至正集卷第四十五終

至正集卷第四十六

碑志三

勅賜崇源寺碑

主送只幹爾朵皇后伯忽篤言夙侍 武宗皇帝被恩務報而
智力靡定作崇源寺資薦冥福請記諸石以昭臣妾事主之誠中
書省以聞臣有壬承詔當筆即其狀筆之曰伯忽篤怯烈氏年十
三八宮 武宗潛邸蚤受知遇及正九五賜內帑楮幣俾作梵
宇以踐矢言工欲成而宮車脫駕矣事 太皇太皇益著恪恭
英宗熟其賢命立 太祖皇后完顏氏幹爾朵三年徙居
世祖皇后凡送只幹爾朵譯言帳殿也 國制 列聖賓天
其帳不曠以后妃當次者世守之迭只則又序於諸帳之上者焉
其徙居於是也地位益崇賜賚日裕惟被恩未報是懼爰念國家

至正集卷第四十六

碑志三

五十八

尊崇釋教嚴飾寺宇於以祐國庇民者殆徧天下女人知力有度
越於是者乎初 仁皇居東宮賜昌平縣史村田七百畝乃即
賜田力事締構為報恩地地形爽塏閑閤邃嚴正殿位佛後殿栖
經翼舍其傍 武宗神御冠其北而方丈拱於後殿西為雲堂
東為香積周廊以居其徒帑庖庖福靡不華備作於泰定甲子三
年迄功俾崇孝僧恆照主治今恆湍繼之楮幣計緡三十餘萬不
資於官不假於人勞費亦至矣臣有壬竊聞佛之教大彌六合細
入無形顧臣固陋何足以知之而所知者則佛以報恩為第一義
故佛書有報恩經首稱波羅門子孝養及須闍提割身肉以飼父
母弘衍其說以極報恩之義厥有旨哉夫所謂報者不獨子之於
父母也若臣之於君也妻妾之於夫也弟子之於師也凡人之於
所遇也有所得則報之不以多寡計也吾儒亦言受人一飯之恩

而不忍忘者其為子必孝為臣必忠一飯之恩至微也而不忍忘
之則其受人之大者可知已世有受大恩而恬不知報一旦有事
乃身先避縮不啻路人亦獨何心哉況固藏嗇用女人之常雖知
其卒無所用寔終其身委以付後之爭者而不肯捐一錢則盡捐
所蓄以報既往之恩不賢能之乎斯石之紀使觀者有激其亦可
裨於世教且使學徒不專於虛寂而凡致力於人事之實擴而充
之佛之向上者可漸得矣臣有壬既紀其實又效其說為之偈曰
佛有大方便經典演微妙報恩弘至理布教及無量含靈皆具性
感觸隨所見彼姝者貴人淑秀者宮壺受恩雖錙銖欲以山嶽報
况得山嶽恩我報宜何如永矢言且且幽明倏殊邈志堅事竟成
傾篋力構築山林爛金碧奉祀極蠲潔冥冥既資佑且盡未來際
佛慈無所擇散福徧沙界 皇祚綿無疆慧日光萬劫民物苟有

願佛悉從所欲凡我林林生學佛當念此為臣勿忘忠為子勿忘孝人而忘忠孝雖在天地間是不與人等我願推此道普度一切人俱為忠孝者俱到大智岸

勅賜順聖寺碑

昔我武宗皇帝之在潛邸也今迭只幹爾朵皇后伯忽篤實侍左右既乃從 太皇太后於覃懷 武皇賓天仍事興聖宮慎

畏自持性强記詢往求故應答周悉 聖母嘗言覃懷獲歸弘

濟聖業非 祖宗在天之靈默佑曲護罔有今日故力事崇

構資福於佛為 祖宗報伯忽篤日聆聖訓而復厚沐撫視

乃效 聖母報 祖宗者以報 聖母出奩蓄楮幣三

十五萬貫有奇買地都城咸宜坊作順聖寺三門夾峙大殿屹立

後建重屋奉 聖母神御西為十二楹連甍有閣竊自為侍祠

之地東規如西而煞其後用度藏經雲堂香積秩秩有位周廊連屬宏麗靜深際通衢為屋三十間取儻貲以助恆費經始至治壬戌之春欲極工緻而監者不稱凡三撤易歷十年而始有成焜煌絢爛照耀闐闐遇者聳觀買田千畝俾永有食擇比邱尼管梅卜主之不紀其故恐後遂湮沒以告中書庶幾上聞而有所屬也省臣敷奏詔臣有壬為文臣有壬詞臣也有命敢辭臣聞佛之教宏大精微其要欲人同歸於善有不言而自信不化而自行之妙焉其徒學者女人為比邱尼蓋百不一二佛以女人多疑惑執者結業纏縛不能自出不使入佛法中而愒曇彌者卒能奉行秘教宣說微妙所謂身無常身念念遷滅代謝不足財眾緣所共無有真主其言亦淵矣乎伯忽篤之報 聖母也慈誠追慕老益不替亦善女人信敬佛法而知所先後者乎身命與旨將究其極若

夫舉所蓄而傾委不靳則已有得於財無真主之言矣昔 聖
母御興聖宮受 二子十孫三帝極天下之養始終十五年中間
受厚恩而極富貴者不知其幾人未聞有一人奮出知報者伯忽
篤以女人淑柔之質而能若是蓋有關於風教宜有以紀之也
皇上孝治天下事佛之宇 列聖神御在焉 聖母既有

所矣伯忽篤復此締葉非瀆也至誠展布隨地而見況及事親密
從殉無地乃得一覩睟容與紫金之光像白毫之光相為炳耀則
孝敬之心油然而生佛之不言而自信不化而自行者實寓乎其
中矣既述其槩若是且頌之曰

象教若海孰挹其深世玩其迹盍求其心匪今斯今固有不欽其
屋如星其徒如林山臺野色知幾萬區曰茲都城鈞天帝居寶構
哭兀鬱乎相輝國帑海嶽涓埃是糜踴踴有人毫積絲累至於千

萬猶水壑委十年營度始盡厥美

聖母在天監觀有赫茲殫

之力實 母之錫陸海洶湧出此兜率東瞻徽儀殿閣咫尺盼嚮

來臨神御有恤 聖孫御天治隆孝敬淑媛有請天休丕應小

臣載筆聖德是紀以彰孝治以慶佛旨惟佛之旨有神御祀祐我
聖嗣承承繼繼子孫孫子與天地終始

勅賜故資德大夫御史中丞贈摠忠宣憲協正功臣河南行
省右丞上護軍魏郡馬文貞公神道碑銘 并序

至正六年七月丁丑集賢侍講學士通奉大夫兼國子祭酒臣天
爵言故資德大夫御史中丞贈摠忠宣憲協正功臣河南行省右
丞上護軍追封魏郡公謚文貞馬祖常早擢高第歷踐要途始終
五朝有文有政宜錫碑紀德庸示報功集賢院臣以聞制可命臣
有壬為文臣玄為書臣起巖篆其額三人皆文貞公同年進士而

有壬託知尤厚始以學士被命繼冒承旨皆職紀述其敢辭公字伯庸世雍古部居靜州天山有錫里吉思者高祖也金季為鳳翔兵馬判官死節贈恆州刺史廟賜褒忠子孫因官以馬為氏曾祖月合乃從世皇征宋留汴掌饋饗累官禮部尚書贈推忠宣力翊運功臣僉樞密院事謚忠懿祖世昌行尚書省左右司郎中贈嘉議大夫吏部尚書父潤朝列大夫同知漳州路總管府事贈中奉大夫河南行省奉知政事追封梁郡公妣楊氏追封梁郡夫人梁公官浮光因家焉公七歲知學得錢即以市書十歲見燭欷燒屋解衣沃水滅之人歎其異蜀儒張公頴講經儀真公未冠質以疑義數十張公奇之科舉詔下鄉會試皆第一廷試第二蓋以國人冠也授應奉翰林文字承事郎同知制誥兼國史院編修官拜監察御史

仁皇久正宸極猶居東宮近侍利燕飲得售所

請公抗言當御正衙立朝儀御史執簡太史執筆雖有懷姦利已乞官賞者亦不敢出諸口承天地祖宗之重當極調攝至於酒醴近侍進御當思一獻百拜之義英廟為皇太子請慎簡師傅下至臣僕亦宜精擇時大姦當國公首知其盜觀國史洎同列疏其十罪仁廟震怒罷之黨與之布列要地者皆論列黜之端人昔與抵牾而攢斥者請拔用之秦州山移公言山不動之物而今動焉豈在野有當用不用之賢在官有當言不言之佞大臣皆家居待罪薦賢拔滯知無不言改宣政院經歷月餘辭歸起為社稷署令罷襍事於泉南大姦復相左遷開平縣尹欲中傷之退居浮光大姦死除翰林待制奉定建儲擢典寶少監太子左贊善尋兼翰林直學士成均釋奠陳太子視學之禮內出禮幣命公助祭除禮部尚書祖母張夫人卒護喪歸起為右贊善復禮部尋辭歸

天歷初再使召為燕王內尉仍入禮部兩知貢舉一為讀卷官時號得人泰議中書省事泰定親郊典儀充讀祝冊官禮成賚金幣拜治書侍御史錫犀帶及御書奎章閣記內廷宴服七襲金玉腰帶各一改徽政副使拜南臺中丞今上即位召議新政賚白金為兩二百楮幣為貫萬金織綺為端四改同知徽政院事拜御史中丞以公疾特免朝禮命光祿日給上尊知經筵進說必陳經史大義泰以祖宗故實持憲務存大體西臺御史劾其僚禁酷時面有酒容以苛細黜之山東憲以孔氏訟聞以事關名教不行按者亦引去司憲有以貪墨敗沒入其田廬請歸曲阜林廟從之拜樞密副使居無幾辭歸復南臺中丞遷西臺疾不赴積階自承事郎至資德大夫至元四年三月丙午薨於光州之第得年六十是年四月壬申葬州北平原鄉西樊里有司以聞有今贈益配索氏

封梁郡夫人子男二武子承務郎湖廣行省檢校官文子徵事郎秘書監著作郎孫男三女二公言事剴切嘗建議國人暨諸部既誦周孔書當尊諸誨以厚彝倫兵家子驕脆有孤任使庶人挽強蹶張老死草野當建武學武舉儲材以備非常時雖弗用識者避之至於論刑則一本哀矜嘗言死罪過赦且原減死流徒未蒙殊渥當驗情遇恩內徙漢人滿百執弓矢獵者死不及百者流條格已有禁弓矢聚眾之條又復為此是錯綜網羅之誠恐愚民舉足蹈罪至論建德民妻之不首夫死者則當以必死其得用法之意乎國家涵濡百年譽髦斯士公先世已事華學至公始大以肆為文精核務去陳言師先秦兩漢尤致力於詩凌轢古作大篇短章無不可傳者與修英廟實錄譯潤皇圖大訓承華事略編集列后金鑑千秋記略若干卷至順間龍虎臺應制賦詩有五食之

賜嘗進擬藁為之歎曰孰謂中原無碩儒乎文集若干卷臺檄刻之揚州郡庠 仁皇始行貢舉國人而下列為四色國人洎諸部為右榜試目視左榜差優公雖右列左列及之者指未易屈焉且其為學初不為貢舉也以挺特之資丁文明之會哀為舉首馴至達官威重足以鎮薄俗文章足以追古作議論足以正風教設科得士不得不以延祐之初為盛也不幸壽僅六十未究其用悲夫銘曰

元大一統六合同風南臺北萊苑生其中部族有儒文貞伊始文貞之世翼翼廟祀後承聿修講學諸夏延昇至公大有無撻蕪然異稟幼不事弄濡衣撲燎智劇碎甕益習以進益混以漸不溺不流而登於岸先秦兩漢華咀實擷天籟冷厲石湍激冽 天子有詔乃興乃賓實三其魁一推國人甫試館職倏哉豸冠以爾衲

鑿安我考樂遐心浮雲束帛空谷春坊翊贊經筵啟沃 皇格於天公司其度俊造鑑衡風紀砥柱厯思異數川委充溢云胡修途六十而板既易其名亦大其封于光之原賜碑崇崇賜碑崇崇於赫厥銘同年之紀考信匪諛維爾部族文貞有躅敦倫敦典益介哉穀

勅賜贈中奉大夫河南江北等處行中書省叅知政事護軍 追封渤海郡公吳公神道碑銘 并序

至正七年八月癸酉 皇帝御慈仁殿中書省臣奏江西行中書省叅知政事臣吳秉彝既封其親請刻銘以昭天休制可詔御史中丞臣有壬為文臣有壬竊謂凡為人子孰不欲顯其親然祿不逮養雖萬鍾五鼎有不易其風木無涯之戚者矣國家推封之典無間存沒庶幾追其不可復者以慰人子之心所以嘉惠臣下

篤於古矣。馳恩隱卒君之仁也。立身顯親臣之孝也。仁孝胥盡，猗歟盛哉。謹按贈中奉大夫河南江北等處行中書省叅知政事護軍渤海郡公諱良字良卿世家於燕。大父諱榮，父諱德信，贈嘉議大夫禮部尚書上輕車都尉渤海郡侯妣錢氏。渤海郡夫人郡公早以孝稱，未嘗一日去親側。禮部患疽，齋沐禱於神，日呪以愈。兄弟三人，友愛尤篤。兄貞監太宬路瑞州酒稅，當輸納於府州，扼山瀕海溝，港沮洳，方六月，暑雨迫，官程不敢緩，與弟用子秉衷偕行，道出兩山間，溪水卒至，貞半涉為暴流所汨，秉衷走援，用繼之，皆溺死。失屍所在，訃至禮部，哀摧幾斃，甦復不食。郡公仰天慟哭，而慰其父曰：「兄若弟，姪之不幸命也。兒必得骸骨而反，於是徒跣求之，暑途淫潦，不遠千里，泝泝溪澗，凡波流旋折，沙礫隱起，靡不剜索，號泣水際，日益不懈，物色衣履果盡得，三尸歸至。」大庾戊戌十月

日卒於家，壽五十有二。配高氏，追封渤海郡夫人。繼宋氏，男一，即秉彝，女二，適崔昇、高秀，皆士族。貞一女，齠齠失父，遂子之。每曰：「吾兄遭酷禍，遺胤止此，當擇壻以嫁，後適董繼昇，任至江浙省叅知政事，封隴西郡夫人。孫男一，庸國子生孫女一，適應奉翰林文字劉佐，平生樂施，與宗姻朋舊有喪，塋不能舉，子女不嫁，娶者悉助成之。卒之九年，秉彝始起家為河間路興濟縣主簿，累遷懿州知州，懿州附治遼陽省，剗割梗阻，秉彝居七年，籍甚，拜監察御史，由兩部京府出典兩郡，兼一道，入踐歷宥密憲臺，中書遂叅預行省。距郡公之卒三十有八年矣。嗚呼！吳氏之先，其世有隱德乎？何其後之盛而報之侈也。郡公發不自躬，委祉後人為善之效章矣。秉彝嘗守臣鄉，郡人念紀其善於石，未果而承詔銘其父碑，夫豈偶然者哉。銘曰：

吳為周宗實始泰伯長沙在漢仍啟王國世遠族綿布獲四方為士為庶或隱或章有家於燕逃聽泯泯淵泉時出厥後以振元宗匪爵語謀維義手足三人遽失其二哀哀猶子俱為湘壘翁將殞絕兒忍子遺骸甑不生猶愈暴棄矢言卒踐與匱偕至行修於家仁施於里貴壽弗有以遺其子其子其承聲實非歟跋跋賢勞席不暇暖酌功孔渥渤海啟封匪恩之私維報之隆邦畿土良幽宮是宅勗爾著存視此銘刻

至正集卷第四十六終

至正集卷第四十七

碑志四

勅賜故中憲大夫嶺北等處行中書省左右司郎中贈集賢直學士亞中大夫輕車都尉追封真定郡侯蘇公神道碑銘并序

中憲大夫嶺北等處行中書省左右司郎中蘇志道既卒之十七年為至元二年丙子歲制贈集賢直學士亞中大夫輕車都尉追封真定郡侯明年正月丁未制詔臣有壬銘其碑陝西諸道行御史臺中丞臣祖常為書江南諸道行御史臺侍御史臣起巖篆其額從臺臣請也蓋志道子天爵為御史臺都事臺臣熟其賢數其父之實而臣有壬待罪中書天爵右司都事是亦熟其子而知其父者 皇帝孝治天下臺臣識風教勵臣子是有繫焉臣有壬

其敢以蕪陋辭乃本其狀而筆之曰公字子寔真定人曾大父元老金亡不應徵辟年九十卒妣孫氏大父誠善治生妣畢氏父榮祖累贈中順大夫禮部侍郎上騎都尉真定郡伯妣吳氏追封真定郡君公年十四居禮部喪廬墓側又奉母十年事葬以禮平陽姚天福守真定舉府吏方旱從決獄而雨辨盜馬成獄之寃辟河東憲吏入為察吏行和林楊州良家子訴賣三易主御史逆詐斥去公曰詐自抵罪訊之果實民而復其里轉戶部令史浙西豪民以佛為標榜相煽為姦眾至數萬號白雲宗握印章以總其屬公私病之詔禮部侍郎高昉治其獄以公從京師五往返始竣事沒貲產鉅萬歸良家子女出註誤數百人擢掾樞密選籍積滯悉舉而行從樞密臣行邊歸掾中書尚書省立勢軋中書掾爭趨之公獨安焉尚書省尋罷乃釐其濫銓起家承直郎中書省檢校官陳

便宜正愆繆黜姦賊吏覈濫出金穀若干六曹吏為悚畏御史咸薦才宜風紀有尼者或勸一往曰謁得御史尚何以御史為哉改刑部主事刪條格便比傳盜有蔓及無辜主者欲盡逮力止之盜內府金獄未具時相亟欲殺之公曰獄未具殺之尚書省所以敗也時相怒會樞密院奏為斷事官經歷而解軍士護視金銀器又遣他往比還失之將論以盜公曰此失耳俾償而免關中之警和林失守和林百年來生植殷富埒內地至是並塞之民奔潰四去天復大雪至文餘畜僵死且盡人並走和林乞食時倉儲僅五萬石米八十萬錢强者相食弱者相枕藉死優秩除吏率難其行公毅然請往擢嶺北行省左右司郎中既至愀然曰天下之事復有急於賑飢者乎白其長發廩賑之人大者三斗小六之一又贖省官為文請於朝曰和林根本之地今倉儲無幾餓莩山積賑飢人

則失軍餉專軍餉則坐視飢死事不兩立揆其緩急已便宜賑之
開平沙靜差近請高佑募民致粟次募四方以先後至為差厚酌
其直民必爭赴而邊儲可實朝廷從之制致粟和林者以三月至
石與五十萬錢四月至減十之一五月至又減其一至即給直於
是民果爭赴而邊儲之實如舊為考覈法使繼者不能為姦諸王
汎索持法一不與王怒使人譙公對曰府藏軍興也有司守之非
軍事誠不敢與皇子安王以衣褒之吳王予名馬受而歸其直時
酒禁多犯朝議謂法輕使然更奏論死令下三日得趙仲良等五
人酒有司論以死公曰酒豈三日可成犯在令前當用前法設當
坐亦宜復讞奏報乃決豈得擅哉上其事法司議當用前法五人
得不死即孔子廟延士講經史率僚屬往聽夜分乃休廟故丞相
順德忠獻王建未就而薨捐俸成之邊民列公政績上之御史而

同列多異遂辭歸至京師卒年甫六十延祐七年二月壬戌也三
月乙酉葬真定縣北新市鄉新城原先塋配劉氏累封真定郡夫
人後四月卒子男五人其四天一天爵也國子員釋褐荊州判官
歷館閣至右司遷刑部郎中遂佐臺幕今禮部侍郎官大中大夫
女三人孫男一人昌文女一人幼公為吏二十載始得官官四轉
皆佐幕而見諸事業若此是知士之生世官不貴大而貴其行事
不務多而務其急故下僚有浮於上官而一事有勝於百千者君
子之觀人必於其大者焉公自弱冠諸父析財不能正獨取薄田
遺書其仕也不肯私謁以求為御史至於和林之贊荒政則茂績
也嘗觀古人列傳或載一事或一二事足以見其人大節況著見
若是者乎蘇氏之先自行唐而樂城樂城而真定閔之者翁故發
之者闡導之者遠故流之者長至公啟矣而猶未暢又一傳得天

爵階三品始疏侯封而馳及大父焉天爵仕日崇疏封未已也古
之人臣服寵嘉而銘器物者不惟章君之賜示不敢忘也天爵推
思其親恩至渥矣而又賜銘墓碑紀休永久其不敢忘而移孝為
忠者其益勗哉銘曰

猗嗟子宣父孰究其諳片言折獄若不能語勁氣拔距若弗克舉
不鄙郡史從讞則兩恢恢游及匪越其沮姦人借佛蠱我士女禮
部擇人于殖于去金山稱海百萬其旅不資贊畫曷張我武崑岡
火炎委局趨附曾不踰時我奪我予廷尉持平文智敢舞 天
子有法相國何怒伊誰教言私謁進取失將千金得未一羽賸茲
和林實我天府百年生殖馳馬布野天胡怒之長驅貔虎蹂我旄
倪蕩我牧圉天雪縷縷飢食無所流民如水積骸如堵拜郎給傳
往佐其撫藩臣孔賢有善斯取總總黃馘僵卧待哺有如赤子遽

得父母馳牛輓輸奔走高佑庾廩充溢國本以固方期用世一夕
今古則公不死有子仕廕 天子有詔刻石表墓於永其垂新
城之下

勅賜故光祿大夫大司徒釋源宗主洪公碑銘

至正七年八月戊寅 皇帝御慈仁殿集賢大學士臣五十四
言故光祿大夫大司徒沙門法洪逮事 累朝其德業有足稱者
願刻石以示永久有旨命御史中丞臣有壬製文且為書翰林學
士承旨臣起巖篆其額臣有壬於洪公非有支許之分而其為學
又異宜不足以知之者然 天子有命其敢辭謹按其事狀擇
而書之公姓劉氏隴西鞏昌成州人生有異稟九歲入鄉校日授
書彙千言輒成誦不忘年十二窺釋氏內外典有契遂辭親禮州
之興化寺武公總攝而祝髮焉又八年從金仙律師受具戒乃發

足游方謁少林法主叅決心要即廓然自得時真覺國師松堂公
居大白馬寺公往依之松堂沙門上輩負海內之望與語大見器
異留侍左右為之發揚宗旨周密微妙遂能窮極法源卒嗣其業
承記傳衣之日靈鶴翔其庭松堂喜曰是必能大吾教矣大德中
總統司請為釋源白馬寺長講號大德法主 武宗皇帝在潛
邸聞其名特命住持秦州大聖壽寺至大改元復命即秦州開演
長講勅有司月給衣糧焉 仁宗皇帝臨御之明年宣政臣奏
旨起公住持白馬寺未幾賜號釋源宗主驛召至京師沙囉迦八
哈失首見推重請主西山龍泉寺尋奉勅翻譯之菩薩行撰大元
帝師八思八文廟碑文成奏御嘉賚甚厚遂詔公住持新建大永
福寺蒞事之日三宮賜白金中宮復製紅衣以衣之 英宗皇
帝時居東宮已虛位信響數嘗引見既即位即授公榮祿大夫司

徒已而進階光祿加大司徒刻銀為印食一品祿承制總選名僧
校讐三藏書領江淮官講凡三十所於是貴幸莫比矣會壽安山
大昭孝寺成詔以公主之大都弘正棲禪上都弘正等寺皆隸焉
大昭孝寺者 英宗之為太子嘗至其處喜其山水明秀左右
或言此山本梵刹也後為道士有耳目屬意焉至是以鈔二萬定
賜道士使別營構因觀基煉石鑿山大啟佛宇功德無量欲資以
慰薦 祖宗在天之靈旨意甚銳惟公具大善知識願力堅
固簡在宸衷其應是選亦可謂非常之遇矣於是車駕臨幸置酒
流盃池上丞相東平王及公侍天顏甚懌顧左右若曰朕有賢相
又得此奇人至可樂也因手簪花其帽諭所以畀付之意故事官
寺方丈每歲望幸主者不敢居特勅大臣設晏命公入處以寵異
之他日丞相就公問所以為治之道公舉儒者經權之論以對丞

相喜曰吾今乃知公有濟世才非徒空言而已泰定初或謀動搖壽安者微公慧力足以攝之則將不得免焉至正二年今上皇帝御龍舟游幸玉泉諸山至壽安以公先朝耆舊特優禮之初天歷中嘗賜鈔三百萬定以其二買田飯僧以其一視規息為國家修建佛事其後官府稍見侵奪至是丞相脫脫公以公故奏請復之比車駕還宮復遣使賜上尊為公壽其被過累朝光顯如此四年春三月六日卒壽七十三為僧凡六十有一年大臣以聞天子憫悼勅有司致賻備儀衛祖送如禮既闋維門人三分其骨瘞壽安白馬及陝西之興教寺而建塔焉公度弟子十餘人得其道者曰允中為昭孝法主與公同日歿嗣法者以百數曰德政主白馬曰道傳曰慧潤主永福壽安則尤所謂傑然者也公為人軌行嚴峻識度開朗其於禪乘律義既究極無遺而於孔老百氏

之書又能鈎引貫穿縱橫出入乎其間故其平生論議多涉獵經史娓娓可觀有雲麓集十卷行於世云臣聞西方之教以空洞為實以有為為妄儒家謂其有體而無用異於聖賢之道也惟大司徒始能以真知三昧啟迪其徒空術既顯及其樹大法幢鳴大法鼓又能以才器文辨見知聖代恩數優渥雖宋慧琳唐不空被過之盛未有能過之者殆所謂為而未始有為無為而無所不為者與故觀所與東平問答又皆平易精實體用兼備其有得於聖賢之學者未可以浮屠之說棄之也謹敘而銘之其辭曰出世之士一切不作流於空愚無有知覺用世之士一切有為流於功利靡所底歸爰有大智見道立卓非律非禪無適無莫白業之積始自秦中雷音振揚達乎九重毳衣來朝當穴前席王后君公膜拜接鳥爵以上卿為帝外臣陰翊乾運密贊皇仁

動言事為有典有則著為文章載在金石壽安之山龍宮翼嚴入
天畢未四聖具瞻樹立門庭廣大堅固孰為為之以我佛故功名
富貴文字語言何有於我得魚忘筌化緣既周委席而去生也則
榮歿有餘譽天子念之臬臣為辭以永其詒

有元扎刺爾氏三世功臣碑銘并序

昭武大將軍河南淮北蒙古軍都萬戶察罕帖穆爾言太祖聖武
皇帝之肇闢天地也先臣大察率所部為前驅四征不庭與有
駿功實察罕帖穆爾之始祖也劉金之役高祖朔魯罕大戰野狐
嶺流矢中額卒賜錦綺萬馬四百疋曾大父忒木爾嗣將世部征
杭里執訊取大珠以獻平西夏推首功 太宗皇帝命行都行
省事總兀魯等五部族將平金賜食邑二千戶 憲宗征蜀日
扈帳殿出戰必捷并晉懷浴之民懷不殺恩皆立生祠以祀而大

父奧魯赤受知

世皇既襲世官又總四萬戶戰襄樊攻沙洋

下郢復破陽羅渡江圍鄂招降其守從大兵鼓行下沿江江東浙
西諸郡獨松關備嚴而守固陰設伏陽樹幟山上單騎突前伏發
守兵驚潰追奔百餘里俘馘無算既入杭分下浙閩諸郡之未下
者追迫二偽孽沒於海宣慰湖北山南二道拜叅預左右丞平章
政事行省江浙湖廣江西兩貳行樞密院湖北新民危疑逃匿山
澤約束勞來俄皆復業軍士俘獲生口多逃歸有司括男女千餘
人欲隸之官謂同僚曰新民幸依其父母隸之官是重被兵也籍
而復宋版之舊平劇盜周龍張虎湖南始寔佐征交趾賊懼避匿
乃梗我歸路轉戰全師而出駟召面籌者三慰勞温至錫賚優渥
復平章政事行省江西薨贈金紫光祿大夫大司徒上柱國江西
行省平章政事追封鄭國公謚忠宣上命大父之征交趾也即命

先人脫完普華襲世官從征乃顏有功以行省左丞行世官都萬戶事

仁皇淵潛覃懷擁護有功拜湖廣行省平章政事進左丞相薨贈銀青榮祿大夫上柱國湖廣行省左丞相追封鄭國公謚宣簡若兄普答刺吉則又攻文事以佐其武精騎射而濟以勇右丞兩省咸以能稱鎮虎北口單騎破敵號着拔突賜有金帶貳行樞密院以過中夏之震驚發私廩以賑兵後人民之野栖無食者院革仍都萬戶邏紫荆關薨於行察罕帖穆爾襲兄職不勝是懼敢妄徵請以勤有司第念一門六葉服勞王家若曾大父而上當天造之初官制簡古若帥若行省各正天工惟是大父丁

世皇混一之會父若兄仕

列聖熙洽之朝雖存歿爵贈已

極隆赫而所謂功臣之號尚稽寵錫敢援故事以請下有司議曰宜乃集禮曹集賢翰林太常擬贈忠宣推忠開武協運佐治功臣

宣簡守忠翊正濟義演德功臣封謚皆如故右丞保忠經武致德宣惠功臣江西行省右丞上護軍追封夷山郡公謚榮襄制可後至元庚辰命下至正丙戌九月昭武扈從歸過安陽諗有壬曰伊水之東先塋在焉世勲已銘矣今也加號三世而銘未有託君賜不章且無以勗後敢以屬子有壬惟周禮司勳其等有六皆銘於太常祭於大蒸而六等之列戰功曰多昭武之三世是已銘太常祭大蒸在古不斲沉所謂號乎古者諸侯薨天子論行以賜謚謚以尊名古之制也功臣之號李唐昉有奉天定難之稱趙宋因之始加四字或六字有至十餘字二十字者皆施之於生以為結銜雖治非隆古而勸忠勵節有取焉我元儀禮制度尤不輕畀至治著令立朝有大節功勳在王室者許加焉皆施之於沒以冠易名天曆初二貴臣始有生加而又有賜大小金符刻其字於上朝

會大宴則佩之蓋異數也惟扎刺爾氏大賢世出殊勲碩畫與國
基命蓋國之世臣也且世臣孟子所重而公羊譏之何哉譏其以
世不以賢也苟得賢如扎刺爾氏諸孫尚何譏乎麗恩茂典不例
恆品且當畀之況見之著令者乎昭武之三世加號禮亦宜哉昔
有河山白馬之誓盟未寒侯者百四十三人已無子遺而我之功
臣尊寵付託始終不替泝其源而導其流溉其根而遂其實相與
保富貴於無窮有士於是見我元崇德報功天覆地載之德
軼炎漢而匹隆古矣雖然席勲業之舊著闕閱之英者亦不可恃
夫天地之德而不自為悠久之念也夫為人孫若子弟孝敬而已
移而為忠臣道斯盡孝敬本立則世臣者雖百世可引也昭武於
祖若父兄既克顯之孝敬備矣後昭武者其聿修無忝銘曰
國重世臣其重以賢泝而高曾公而曾元族有述適貴曾則一攀

鱗翁從橫戈四出瀚海之西昧谷之東靡遠弗至靡戰弗從繼體
總戎挺額受矢罔俾萬春專美唐史倬彼前烈克承以似民死而
生有嚴廟祀桓桓忠宣造攻樊襄四萬其師虎節龍章長江涵涵
一葦可杭遇無完壁迎有簞食斬關獨松追播海涘新民安堵全
師飲至宣簡襲部鳧藻允諧平叛遼東捧日覃懷惟橋有梓實邦
之楨塞垣摧敵突騎衡行疏郡夷山錫嘉發榮榮裏有弟忠宣有
孫我先不顯曷裕後昆名非眩實於以勸忠三世沛澤八字表功
伊水悠悠象彼世澤伊闕如礪我功不泐

至正集卷第四十七終

Faint vertical text columns, likely bleed-through from the reverse side of the page.

Small vertical text on the right edge of the page, possibly a page number or marginal note.

48-11699

